

کِتابِ مُکاشفه

پیشگفتار

کِتابِ مُکاشفه زمانی نوِشته شُد که ایماندارای عیسیٰ مسیح ازی که عیسیٰ مسیح ره مَولا مُوگفت، آزار-و-آذیت مُوشد. مقصدِ اصلی یوحنا ای استه که ایماندارا ره تشویق کنه و بَلَدِه ازوا اُمید بِدیه تا اُونا دَ وخت سختی و مشکلات دَ ایمان خُو مُستَحکم و وفادار بُمنه.

کَلونی امزی کِتاب رویا های اَسته که بَطْورِ تَشبیه و سرپوشیده بیان شده و ایمانداری امزُو زمان او ره خوب پَی مُوبُرده، ولے بَلَدِه دِیگرو پُر از رَمز-و-راز اَسته.

دَ امزی کِتاب یوحنا از طرفِ خُدا یگ رویا مِینگره و دَ امزُو رویا دَز شی هِدایت دَده مُوشه که بَلَدِه هفت جماعتِ ایماندارِ ولایتِ آصیا خط نوِشته کنه و اُونا ره ام تشویق کنه و ام اخطار بِدیه. باقی رویای یوحنا دَ باره جنگِ لشکر های خُدا و

لشکر های اِبْلِیس آسته که دَ امْزُو جنگ اِبْلِیس شِکست

مُخوره و آسمو و زمِین نَوَ دَ وجود مییه که دَ وسِیله شِکوه-و-
جلالِ خُدا روشو-و-درُخshan آسته.

فهرستِ عنوانها

مُقدمه (فصل ۱ آپه ۱)

شروع پیشگویی (۱۴:۱)

روایی یوحنا (۹:۱)

خط ها بَلِدِه هفت جماعتِ ایماندار (۲۲:۳ تا ۲۲:۲)

تختی که دَ عالم باله یه (۱۱:۱۴)

طومار و باره (۱:۵)

کندونِ مُهر ها (۱۱:۶)

یگ صد و چِل و چار هزار (۱۱:۷)

گروه کُله قد کالاهای سفید (۹:۷)

مُهرِ هفتم (۱۱:۸)

هفت شیپور (۸:۸)

ملایکه و طومار ریزگگ (۱۱:۱۰)

دُو شاهِ خُدا (۱۱:۱۱)

شیپورِ هفتم (۱۱:۱۵)

خاتُو و آژدار (۱۱:۱۲)

جانوَرِ وَحشی دریا (۱:۱۳)

جانوَرِ وَحشی دوم (۱۱:۱۳)

باره دَ بَلِه کوهِ صَهیون (۱:۱۴)

سِه ملاِیکه (۶:۱۴)

شُروعِ کارِ دروگرا (۱۴:۱۴)

هفت ملاِیکه و هفت بَلَه (۱:۱۵)

هفت پیله غَضَبِ خُدا (۱:۱۶)

فاحِشِه کَلَه (۱:۱۷)

سُقوطِ شارِ باُبُل (۱:۱۸)

خوشی دَ عالِم باله (۱:۱۹)

هزار سال (۱:۲۰)

محْكُوم شُدُون شَبَطُو (۷:۲۰)

قضاؤتِ مُرَدَّهَا (۱۱:۲۰)

اورُشَلَیم نَو (۱:۲۱)

دریای آبِ حیات (۱:۲۲)

مُقدَّمه

۱ ای مُکاشِفه عیسیٰ مسیح آسته که خُدا بَلِه شی دَ دَ تا

چیزای ره که دَ زُودی باید واقع شُنَه، بَلِه خِدمتگارای خُو نِشو

بَدیه. او ملاِیکه خُو ره رَیی کد تا امُو چیزا ره بَلِه خِدمتگار

خُو يوَحَّنَا بَرْمَلَا كُنَهٌ. ^۲ وَ يوَحَّنَا دَ بَارِه تمامِ چِيزَاي که دید

شاھِدی مِيدِيَه، يعني د بارِه کلامِ خُدا و شاھِدی عیسیٰ مسیح.

نيک د بَختِ کسی که کلمه های امزی پیشگویی ره میخانه ^۳

و نیک د بَختِ کسای که گوش مِيگیره و چِيزَاي ره که دَمزی

پیشگویی نوشتہ يه نِگاه مُونه، چراکه وخت نزدِیک أَسته.

شروع پیشگویی

از طرفِ يوَحَّنَا، بَلَدِه هفت جماعتِ ايماندارا که د ولايتِ آسيا ^۴

أَسته: فيض و سلامتی از طرفِ امزُو که أَسته، بُود و میمه

نصِيب شمو شنه و از طرفِ هفت روح که د پیشِ رُوي تَخت

شی أَسته، ^۵ و از طرفِ عیسیٰ مسیح که شاھِدِ راستگوی أَسته

و اوَّلين کسی که از مینکلِ مُرده ها زِنده شُده و حُكمرانِ

پادشايونِ زمی يه.

امُو که مو ره مُحَبَّت مُونه و مو ره از گُناهای مو قد خُون خُو

آزاد کد ^۶ و مو ره د پادشاهی رَسَند تا د عنوانِ پیشوا بَلَدِه خُدا

يعنى آته شی خِدمت کنى؛ جلال و قُدرت تا آبداللاباد اُزو باد!

آمين.

اونه، او قد آور ها میبیه ^۹

و هر چیم او ره مینگره،

حتی کسای که او قد نیزه زده؛

و تمام قوم های روی زمی بخاطر ازو ماتم مونه.
آرے، امی رقم موشہ! آمین.

خُداوند-خُدا مُوگیه: "ما «أَلِف» و «يَا» أَسْتُم، امُو که أَسْتَه،
بُود و میبیه، امُو قادِرٍ مُطْلَق." ^{۱۰}

رویای یوحنا

ما یوحنا، برار شُمو أَسْتُم که دَ آزار-و-أذىت و دَ پادشاهی و دَ
صَبر-و-حَوصله دَ وسِيله عيسی مسیح قد شُمو شرِيك أَسْتُم.
ما بخاطرِ کلامِ خُدا و شاهِدی دَ بارِه عيسی مسیح دِ یگ
جزیره دَ نامِ پاتموس بُودم ^{۱۱} که دَ روزِ مَولا دَ زیرِ تاثیرِ روح
قرار گِرفتم و از پُشت خُو یگ آوازِ بلند رقمِ آوازِ شبپور شِنیدم
که گفت: "چیزی ره که مینگری دِ یگ کِتاب نویشه کُو و دَ
هفت جماعتِ ایماندارا رَیی کُو، یعنی دِ افسُس، اسمیرنا،

پرگاموس، تیاتیرا، سارِس، فیلادلفیه و لائودیکیه.

۱۲ اوخته رُوی خُوره دَور دَدُم تا صاحِبِ امزُو آواز ره که قد ازمه توره مُوكْفت بِنگرم؛ و غَيْتِيکه رُوی خُوره دَور دَدُم هفت چراغدانِ طِلّایی ره دِيدُم^{۱۳} و دَمینکلِ چراغدانانِ يَگو کس رقم «باچه انسان» الی بُود که چَپَنِ دراز پوشیدُد و شالِ زَرین دَبَله سِینِه شی بُود.^{۱۴} سر و مُوی شی رقم پاشُم الی سفید بُود، سفید مِثِلِ بَرف؛ و چِیمای شی رقمِ الَّنگِه آتش،^{۱۵} پای های شی رقمِ بِرِنجِ جَلا دَدگی که دَکوره آتش جَلا دَده شُدَه بشَه و آواز شی رقمِ غُرشِ آوهای کَلو.^{۱۶} او دِستِ راستِ خُو هفت سِتاره دَشت و از دان شی شمشیرِ تیزِ دُو دَم بُر مُوشُد و چهرِه شی رقمِ آفتَو الی بُود که روشنی بَقوَت مِیدَد.

۱۷ وختِيکه او ره دِيدُم رقمِ مُرده الی دَپیش پای های شی افتَدُم، ليکِن او دِستِ راستِ خُوره دَبَله مه ايشته گفت: «ترس نَخور، ما اوَّل و آخرِ أَسْتُم^{۱۸} و امُو که زِنده يَه. ما مُرده بُودُم، ولے توخ کُو، الی تا أَبَدُ الْأَبَاد زِنده أَسْتُم و كِلی های مَرگ و عالمِ مُرده ها دَپیش از مه يَه.^{۱۹} پس چیزای ره که دیدی و چیزای ره که أَسْتَه و چیزای ره که بعد ازی واقع مُوشَه نوِشته کُو. رازِ امزُو هفت سِتاره که دِست راست مه

دیدی و رازِ امزُو هفت چراغدانِ طلایی اینی استه: امُو هفت سِتاره ملایکه های هفت جماعتِ ایماندار آسته و امُو هفت چراغدان امُو هفت جماعتِ ایماندار.

بَلِدِه جماعتِ ایماندارای شارِ افسُس

۲ ^۱ بَلِدِه ملایکه جماعتِ ایماندارای افسُس نوشه کُو:

امُو کسی که هفت سِتاره دِ دستِ راست خُو دَره و دَ مینکلِ هفت چراغدانِ طلایی قَدم مِیزنه اینی تورا ره مُوگیه: ^۲ ما از اعمال تُو، از زَحمت و صَبر-و-حَوصله تُو باخبر آسْتم. ما مِیدَنُم که تُو مردمای شریر ره تَحَمُل نَمِیتنی؛ تُو امُو کسای ره که خود ره رسول مُوگیه، ولے نِیسته آزمایش کدی و پَی بُردی که اونا دروغگوی آسته. ^۳ تُو صَبر-و-حَوصله کدی و بخاطرِ نامِ ازمه سختی ها ره تَحَمُل کدی و منده-و-دلسرد نَشَدی.

لیکِن امی یگ شِکایت ره دَ ضد تُو دَرم: تُو عِشق-و-علاقه اوّلی خُو ره ایله کدے. ^۴ پس دَ یاد خُو بَیرو که از کُجا افتَدَے! توبه کُو و امُو اعمال ره انجام بَدی که دَ اوّل انجام مِیدَدی. اگه توبه نَکُنی، ما دَ پیش تُو میئیم و چراغدان تُو ره از جای

شی باله مُونم. لیکن امی یگ خوبی ره دَری که از کارای

نیکولائیان بَد مُوبِری، امُو رقم که ما ام بَد مُوبِرُم.^۷ هر کسی

که گوشِ شِنوا دَرَه، گوشِ بِگِیره که روح بَلَدِه جماعت های

ایماندارا چیز خیل مُوگیه. هر کسی که پیروز شُنَه، ما بَلَدِه ازْو

حق مِیدِیم که از درختِ حَیات که دَبَاغِ بِهشتِ خُدا آسته،

بُخوره.

بَلَدِه جماعتِ ایماندارای شارِ اسمیرنا

بَلَدِه ملایکِه جماعتِ ایماندارای اسمیرنا نوِشته کُو:

امُو کسی که اوّل و آخر آسته، امُو که مرد و دُوباره زنده شُد،

اینی تورا ره مُوگیه:^۸ ما از مُصِبِّت و غَرِبَی تُو خبر دَرُم،

با وجودِ که دولتمَند آستی! ما از بَدگویی امزُو کسا خبر دَرُم که

خود ره یهودی مُوگیه، ولے یهودی نییه، بَلَکِه جماعتِ شَیطُو

آسته.^۹ از رَنج-و-عذابی که دَبَله تُو آمدَنی آسته، ترس

نَخور. باخبر بش که اِبْلِیس بعضی از شُمو ره دَبَندی خانه

مینَدَزه تا آزمایش شُنِید و بَلَدِه دَه روز شُمو رَنج-و-عذاب

مینَگرید. لیکن تا دَمِ مَرگ و فادار بش و ما تاجِ حَیات ره دَز

تُو مِیدِیم.^{۱۰} هر کسی که گوشِ شِنوا دَرَه، گوشِ بِگِیره که

روح بَلَدِه جماعت های ایماندارا چیزخیل مُوگیه. هر کسی که پیروز شُنَه، از مرگِ دُوم هیچ ضَرَر نَمِینَگَرَه.

بَلَدِه جماعتِ ایماندارای شارِ پِرگاموس

۱۲ بَلَدِه ملا یکِه جماعتِ ایماندارای پِرگاموس نوِشته کُو:

امُو کسی که شمشیرِ تیزِ دُو دَمَ دَرَه، اینی تورا ره مُوگیه:
۱۳ ما مِیدَنُم که تُو دَ کُجا زِندگی مُونی، دَ جای که تَختِ
شَیطُو آسته. ولَے با وجودِ ازی ام تُو دَ نامِ ازمه قایم-و-أَسْتَوار
مندَے و ایمانی ره که دَز مه دَری انکار نَکَدَے، حتَّی دَ امزُو
روزای که آنتِیپاس شاهِدِ وفادار مه دَ مینکل شُمو، دَ جایی که
شَیطُو بُود-و-باش دَرَه کُشته شُد.

۱۴ مَگَم چند چِیز دَ ضدِ تُو دَرُم: تُو دَ اُونجی کسای ره دَری که
از تعليِمِ بِلعام نَبَی پَیَرَوی مُونه، از تعليِمِ کسی که بالاق
پادشاه ره ياد دَد که دَ دَمِ رُوی بنی اسرائیل سنگِ لَخَشَنْدُک
بیله تا اونا از خوراک های که بَلَدِه بُت ها قُربانی شُده بُخوره
و دَ زِناکاری گِرفتار شُنَه. ۱۵ امی رقم تُو بعضی کسای ره ام
دری که از تعليِمِ نیکولائیان پَیَرَوی مُونه. ۱۶ پس توبه کُو! اگه

نه، دَ زُودِي دَ پیش تُو مییم و قد شمشیر دان خُو دَ خِلافِ ازوا
جنگ مُونم.^{۱۷} هر کسی که گوشِ شنوا دَره، گوش بِگیره که
روح بَلِدِه جماعت های ایماندارا چیزخیل مُوگیه: هر کسی که
پیروز شُنَه، ما از «من» تاشه شُدَه بَلِدِه شی میدیم و ام یگ
سنگِ سفید بَلِدِه ازُو میدیم که دَ روی امزُو سنگ یگ نامِ نو
نوِشته یَه که هیچ کس او ره نَمُوفامه بَغیر از کسی که او ره د
دِست میره.

بَلِدِه جماعتِ ایماندارای شارِ تیاتیرا

بَلِدِه ملا یکِه جماعتِ ایماندارای تیاتیرا نوِشته کُو:^{۱۸}

باچه خُدا که چیمای شی رقمِ النگِه آتش الی و پایای شی رقمِ
برِنجِ جَلَا دَدگی اَسته اینی توره ها ره مُوگیه:^{۱۹} ما از اعمال
تُو، از مُحَبَّت، ایمان، خِدمت و صَبر-و-حَوصلِه تُو خبر دَرم و
میدَنُم که کارای آخر تُو از اول کده خوبتر اَسته.

لیکِن امی یگ شِکایت ره دَ ضد تُو دَرم: تُو امُو خاتُو ره که
ایزابِل نام دَره سر ایله ایشته، امُو ره که خود ره پیغمبر
مُوگیه و قد تعليیم خُو خِدمتگارای مَره گُمراه مُونه، تا زناکاری

کُنْه و از خوراک های که بَلِدِه بُت ها قُریانی شُده، بُخوره.

۲۱ ما بَلِدِه شی وخت دَدُم که از زِناکاری خُو توبه کُنْه، لیکِنْ او نَمیخایه که توبه کُنْه. ۲۲ اینه، ما او ره مِیزَنْم که دَجاگه بُفته و کسای ره که قد ازو زِنا مُونه دَرَج-و-مُصِبِّت سخت گِرفتار مُونْم، سِوای که اونا از کارای خُو توبه کُنْه؛ ۲۳ و ما پَیَرَوَای ازو ره مِیزَنْم که بُمُرَه. اوخته تمام جماعت های ایماندارا مِیدَنَه که ما امُو اَسْتُم که دِل ها و فِکرا ره کُنج-و-کاو مُونْم و هر کُدَم شُمو ره دَمُطَابِقِ اعمال شُمو اَجر یا جَزا مِیدِیم.

۲۴ لیکِنْ بَلِدِه باقی شُمو که دَتیاتیرا اَسْتِید، شُمو کسای که ای تعلیم ره قبُول نَکِدِید و چِیزی ره که «رازِ غُوج شَیطَو» گُفته مُوشه یاد نَگِرَفتَید، دَز شُمو مُوْگم که ما کُدَم بارِ دِیگه ره دَبَلِه شُمو نَمیَلُم، ۲۵ فقط دَ چِیزی که دَرید محکم بَشِید، تا وختیکه ما بَیِّم. ۲۶ کسی که پیروز شُنَه و کارای مَرَه تا آخر دَجای بیره، او ره دَبَلِه مِلَّت ها قُدرَت-و-اختیار مِیدِیم: ۲۷ او قد سوِّله آینی دَبَلِه ازوا حُکمرانی مُونه و اونا ره رقمِ کُوزه گَلَى مِیدَه مِیدَه مُوْکنَه، امُو رقم که ما قُدرَت-و-اختیار ره از آتِه آسمانی یافتُم. ۲۸ امچُنان بَلِدِه ازو سِتاره صُبح ره مُوبَخْشم. ۲۹ هر کسی که گوشِ شِنَوا دَرَه، گوشِ بِگِیره که روح بَلِدِه

جماعت های ایماندارا چیزخیل مُوگیه.

بَلِدِه جماعتِ ایماندارای شارِ سارِ دس

۳

^۱ بَلِدِه ملایکه جماعتِ ایماندارای سارِ دس نویشته کُو:

امو کسی که هفت روح خُدا و هفت ستاره دَره اینی توره ها ره
مُوگیه: 'ما از کارای تو باخبر آستم؛ تو نام بُر کدے که زِنده
آستی، ولے مُرده يی. ^۲ بیدار شُو و چیزای ره که باقی مَنده و
نزدیک دَ مُردو يه، قُوت بِدی، چراکه ما اعمال تو ره دَ حُضور
خُدا کامل نیافشم. ^۳ پس چیزی ره که حاصل کدی و شِنیدی دَ
یاد خُو بَیرُو و او ره دَ جای آورده توبه کُو. لیکن اگه بیدار
نَشنی، ما رقم دُز الّی دَ بَلِه تو میئیم و تو نَمُوفامی که دَ کَدم
زمان دَ بَلِه تو میئیم. ^۴ لیکن هنوز چند نفر دَ سارِ دس دَری که
دامون خُو ره ناپاک نَکده و اونا دَ کالای سفید قد ازمه قَدم
میزنه، چراکه لایق شی ره دَرَه. ^۵ هر کسی که پیروز شُنَه رقم
ازوا کالای سفید دَ جان شی دَده مُوشَه و نام ازو ره هرگز از
کتابِ حیات گُل نَمُونم، بلکه نام ازو ره دَ حُضور آتِه خُو و
ملایکه های شی اقرار مُوکنم. ^۶ هر کسی که گوشِ شِنوا

دره، گوش بِگیره که روح بَلَدِه جماعت های ایماندارا چیز خیل مُوگیه.

بَلَدِه جماعتِ ایماندارای شارِ فِیلا دِلفیه

بَلَدِه ملایکه جماعتِ ایماندارای فِیلا دِلفیه نوشته کُو:

امُو کسی که مُقدَّس و حق آسته، امُو کسی که کلی داؤود ره
دره، امُو که واز مُونه و هیچ کس بسته کده نَمِیتنه، امُو که
بسته مُونه و هیچ کس واز کده نَمِیتنه، اینی توره ها ره
مُوگیه: ^۱ما از اعمال تُو باخبر آستم. اینه، ما یگ درگه واز
ره دَپیشِ رُوی تُو ایشتم که هیچ کس او ره بسته کده نَمِیتنه؛
ما میدَنُم که قُوت تُو کم آسته، ولے تُو کلام مَرَه نِگاه کدی و
نام مَرَه إنکار نَکدی. ^۲اینه، امُو کسای که از جماعتِ شیطو
آسته و خود ره یهودی مُوگیه ولے نیبه و دروغ مُوگیه، ما اونا

ره وادار مُونم که بیبه و دَپیشِ پایای تُو بُفته و بِدنه که ما تُو
ره دوست دَرُم. ^۳ازی که تُو کلام مَرَه قد صَبر-و-حَوصله نِگاه
کدی، ما ام تُوره از ساعتِ آزمایش نِگاه مُونم که دَبِله تمام
دُنیا آمدَنی آسته تا تمامِ کسای که دَرُوی زمی زندگی مُونه
آزمایش شُنَه. ^۴ما دَزُودی مییم؛ پس دَچیزی که دَری محکم

بَش، تا هېچ کس تاج تُو ره گِرفته نَنَنه.^{۱۲} هر کسی که پیروز شُنَه، او ره دَخانِه خُدای خُويگ سُتون جور مُونُم و او هرگز ازُونجى بُرو نَموره. ما دَبَله ازُونام خُدای خُو ره نوشتة مُونُم و نامِ شارِ خُدای خُو ره يعني نامِ اورُشَلِيم نَو ره که از عالم باله از طرفِ خُدای مه مییه و امچنان نامِ نَو خود ره.^{۱۳} هر کسی که گوشِ شِنوا دَره، گوش بِگیره که روح بَلدِه جماعت های ایماندارا چیز خیل مُوگیه.

بَلدِه جماعتِ ایماندارای شارِ لائو دِیکیه

بَلدِه ملا یکِه جماعتِ ایماندارای لائو دِیکیه نوشتة کُو:

امُو که «آمین» گفته مُوشه، امُو شاهِدِ صادِق و راستگوی که سرمنشِه خِلقتِ خُدا أَسته، اينی توره ها ره مُوگیه:^{۱۵} ما از اعمال تُو خبر دَرم؛ تُو نَه سَرد أَستي و نَه گرم. کشِکه يا گرم مُوبُودی يا سَرد.^{۱۶} پس، بخارطه که تُو دِلمَل أَستي، يعني نَه گرم و نَه سَرد، تُو ره از دان خُو تُف مُونُم.^{۱۷} چون تُو مُوگی: "ما دَولتمند أَسْتُم و مال-و-دولت جم کدیم و دَ هېچ چیز مُحتاج نیَسْتُم." مگم تُو خبر نَدری که بیچاره، مُسکِین، غَرِیب، کور و لُچ أَستي.^{۱۸} ما تُو ره نصِیحت مُونُم که طِلَّای دَ آتش خالِص

شُدَه ره از مه بِخْر تا دَولَتَمَنْد شُنْي؛ وَ كَالَّا ي سَفِيد ره بِخْر تا
بُپُوشى و شرمندگى لُچى خُو ره بُپُوشنى، و مَلَم ره بِخْر تا دَ
١٩ چِيمَى خُو مَليَدَه بِيَنا شُنْي. كَسَاي ره كَه ما دَوَسْت دَرْم،
أُونَا ره سَرْزَنْش و إِصلاح مُونْم؛ پس سِرِ غَيرَت شُو و توبَه كُو.
٢٠ اينَه، ما دَانِ درَكَه اِيَسْتَه شُدَه طَخ طَخ مُونْم؛ اَكَه كَس آواز
مَرَه بِشَنَوه و درَكَه ره واز كُنه، ما دَپِيشِ اُزو دَاخِل مُورُم و قد
اُزو نان مُوخُورُم و او ام قد ازمه نان مُوخُوره.

٢١ هر كسى كه پيروز شنه، ما اي حق ره دَزُو مِيدِيْم كه قد
ازمه قتي دَبَلَه تَخت مه بِشِينَه، امُو رقم كه ما پيروز شُدُم و
قد آته خُو قتي دَبَلَه تَختِ اُزو شِشْتُم. ٢٢ هر كسى كه گوش
شِنَوا دَره، گوش بِكِيره كه روح بَلِدَه جماعت هاي ايماندارا
چيز خيل مُوكِيه.

تَختَى كه دَ عَالَم بالَّه يَه

٢٣ بعد اُزو چيزا ما توخ كُدم و دِيدُم كه يَگ درَكَه دَ عَالَم
بالَّه واز أَسْتَه و امُو آواز ره كه دَ اَوَّل شِنَيَدَه بُودُم كه رقم آواز
شيپُور قد ازمه گپ مِيزَد، بسم گفت: ”دَ اينجَى بالَّه بِيه و ما

چیزای ره بَلَدِه تُو نِشو مِیدِیم که بعد ازی باید واقع شُنَه.

۲ بے بلغه دَ زیرِ تاثیرِ روح قرار گِرفتم و دِیدم که دَ عالم باله

یگ تَخت آسته و دَ بَلَه امزُو تَخت یَگو کس شِشته. ۳ امو که دَ

اونجی شِشتد رقِم سنگِ یَشم و عَقِيق نُورانی معلوم مُوشُد و دَ

گِرداگِرد تَخت یگ رنگین کمان بُود که رقمِ زَمَرْد الَّى دَ نظر

مُخورد. ۴ دَ گِرداگِرد تَخت، بِیست و چار تَختِ دِیگه بُود و دَ

بَلَه امزُو تَخت ها بِیست و چار بُزرگ شِشتد که كالای سفید دَ

جان خُو دَشت و دَ سِرِ هر کُدم ازوا تاج طَلَابی بُود. ۵ امزُو

تَخت آتشک ها و غُرشِ ها و گُرگُر دراغ ها بُر مُوشُد. دَ پیشِ

رُوی تَخت هفت چراغ مُوسوخت که هفت روح خُدا آسته.

۶ امچُنان دَ پیشِ رُوی تَخت یگ چیز رقمِ دریای شیشه معلوم

مُوشُد، رقمِ بِلور. دَ مینکلِ تَخت و دَ گِرداگِرد تَخت چار

مَوْجُودِ زِنده بُود که پُشت و پیشِ ازوا پُر از چیم بُود. ۷ مَوْجُودِ

زنده اوّل رقمِ شیر بُود، دوّمی شی رقمِ گوسله بُود، سِومی شی

چهره رقمِ انسان دَشت و چارمی شی رقمِ بُرگِح پرواز کده بُود.

۸ امو چار مَوْجُود زِنده هر کُدم شی شَش بال دَشت و گِرداگِرد و

طرفِ داخِلِ بال ها پُر از چیم بُود. اونا شاو و روز بِدونِ

دَمِراسی مُوگفت:

”قدُوس، قدُوس، قدُوس،“

خُداوند-خُدای قادرِ مُطلق

که بُود و أَسْتَه و مَيْيَه.“^٩

هر غَيْتِي که امُو مَوْجُوداتِ زِنَدَه امُو رَه که دَبَلَه تَحْت شِشْتُد و
تا آبَد زِنَدَه يَه، بُزُرگَی-و-جَلَال دَدَه اِحْتِرام و شُكْر-و-سِپَاس
مُوكَد،^{١٠} امُو بِيَسْت و چار بُزُرگ دَحْضُورِ امْزُو که دَتَحْت
شِشْتُد و تا آبَد زِنَدَه يَه مَوْفَتَد و اوْ رَه پَرْسِتِش مُوكَد؛ اُونَا تاج
هَايِ خُو رَه دَپِيشِ رُوي تَحْت پُورَتَه کَدَه مُوكَفَت:

”آي خُداوند-خُدای مو، تُو لَايِق شِي رَه دَرِي^{١١}

که جَلَال و حُرْمَت و قُدرَت پَيَدا کُنَى،

چُون تُو تمامِ چِيزَا رَه خَلَقَ كَدَى

و دَخَاست-و-إِرادَه ازْتُو اُونَا دَوْجُودَه اَمَده و أَسْتَه.“

۵ اوخته د دِستِ راستِ امْزو که دَبَلِه تَخت شِشْتُد، يِگ طومار ره دِيدُم که دَپُشت و رُوی خو نوِشته دَشت و قد هفت مُهر، مُهر-و-لاک شُدد.^۱ و يِگ ملایکه قُدرتمند ره دِيدُم که قد آوازِ بلند اعلان مُوكد که، "کِی لایق شی ره دَره که مُهرای طومار ره کنده او ره واز کنه؟"^۲ ولے هیچ کس د آسمو و يا د رُوی زمی يا د زیر زمی نَتَنِیست که امو طومار ره واز کُنه و مَنِه شی ره بِنگره.^۳ و ما زار زار چخرا مُوكدم، چون هیچ کس پَیدا نَشَد که لایق واز کدون امْزو طومار مُوبُود و مَنِه شی ره مِیدِید.^۴ اوخته يکی امْزو بُزرگا دَز مه گفت: "چخرا نَکو! اونه، شیر طایفه یهودا که از ریشه داوود آسته، پیروز شُده تا هفت مُهر طومار ره بِکَنه و او ره واز کُنه."

۶ بعد اُزو دِيدُم که دَبَین تَخت و چار مَوْجُود زِنده و دَمِينکل بُزرگا يِگ باره ايسته بُود که رقم باره حلال شُده بُود. او هفت شاخ و هفت چِیم دَشت که هفت روح خُدا آسته و دَتمام زمی رَیی شُده.^۵ او آمد و طومار ره از دِستِ راستِ امْزو که دَبَلِه تَخت شِشْتُد، گِرفت.^۶ و ختیکه طومار ره گِرفت، امو چار مَوْجُود زِنده و امو بِیست و چار بُزرگ، دَپیش باره رُوی د

خاک اُفتَد. هر کُدَم ازوا يگ بَرِيط دَشت و جامَك های طِلَّابی
پُر از بُخور خوشبوی که دُعا های مُقدَّسین آسته.^٩ اونا يگ سرُود نَو میخاند:

”تُو لایق شی ره دَری که طومار ره بِگیری

و مُهراي شی ره واز کنى،

چراکه تُو حلال شُدی

و قد خُون خُو مردم ره از هر طایفه و زِبُو و قَوم و مِلَّت
بَلْدِه خُدا خَریدی

١٠ و ازوا بَلْدِه خُدای مو پادشايو و پیشوايو جور کدي

و اونا دَبَلِه زمی پادشاهی مُونه.“

١١ بعد اُزو ما توخ کُدُم و آوازِ ملايكه های کَلو ره شِنِيدُم که
گرداگرد تَخت و مَوْجُوداتِ زِنده و بُزُرگا ره گِرفتُد و تعدادِ ازوا
لَک ها و هزاران هزار بُود.^{١٢} اونا قد آوازِ بِلنَد مُوگُفت:

”باره که حلال شُد لایق شی ره دَره“

که قُدرت و دَولت، حِكْمَة و قَوْت،

حُرْمَة و جَلَال دَشْتَه بَشَه و سِتَايِش شُنَه. ”

۱۳ اوخته شِنِيدُم که تمام مخلوقاتی که دَآسمُو، دَرُوی زَمَى، دَزِيرِ زَمَى و دَدَرِيَا أَسْتَه و چِيزَاي که دَمَنِه ازوَا وجُود دَرَه،
مُوگُفت:

”سِتَايِش و حُرْمَة، جَلَال و قُدرت

امْزُو بَشَه که دَبَلِه تَخْت شِشْتَه و از باره تا أَبَدْأَلَابَاد!

۱۴ و امُو چار مَوْجُودِ زِنَدَه گُفت: ”آمِين!“ و امُو بُزُرَگَا رُوی دَخَاك اُفتَدَه او ره سَجَدَه کد.

کندونِ مُهر ها

۱۵ اوخته دِيدُم که باره يکی امزُو هفت مُهر ره واز مُونه و
شِنِيدُم که يکی امزُو چار مَوْجُودِ زِنَدَه قد آواز رقمِ گُرگُر دراغ
آلی مُوگیه: ”بَيَه!“ و دِيدُم که اونه، يگ آسِ سفید مییه و
کسی که دَبَلِه شی سوار بُود، يگ كَمُون دَشت. بَلَدِه اُزو يگ

تاج دَدَه شُدَّ وَ أُو پِيروزْمَنْدانَه پِيَش رَفَت تا پِيروز شُنَه.

٣ وختیکه او مهر دوم ره واز کد، شنیدم که موجود زنده دوم مُوگیه: “بیه!”^٤ او خته یگ آس دیگه که رنگ آتشی داشت بُرُو آمد و بَلَدِه کسی که دَبَلَه شی سوار بُود، قدرت دَدَه شُدَّ تا صلح ره از زمی باله کنه تاکه مردم یگدیگه خو ره بُکُشه. بَلَدِه ازو یگ شمشیر کله ام دَدَه شُدَّ.

٥ غیتیکه او مهر سوم ره واز کد، شنیدم که موجود زنده سوم مُوگیه: “بیه!” و دیدم که اونه، یگ آس سیاه مییه و کسی که دَبَلَه شی سوار بُود، دِست خو یگ ترازو داشت.^٦ و از مینکل امزُو چار موجود زنده، یگ آواز ره شنیدم که مُوگفت: “یگ مَنَک گندم مُزد یگ روز کار و سه مَنَک جو مُزد یگ روز کار و د روغو و شراب ضَرَر نَرسَن.”

٧ وختیکه او مهر چارم ره واز کد، آوازِ موجود زنده چارم ره شنیدم که مُوگیه: “بیه!”^٨ و دیدم که اونه، یگ آس کبود مییه و کسی که دَبَلَه شی سوار بُود «مرگ» نام داشت و عالم مُرده ها از پُشتِ ازو میمَد. بَلَدِه ازوا قدرت دَدَه شُدَّ تا مردم یگ چارم زمی ره د وسیله شمشیر، قحطی، مَرض وُبا و

جانورای درنده رُوی زمی بُکشه.

وختیکه او مُهر پنجم ره واز کد، دَزیر قُربانگاه جان های
کسای ره دیدم که بخاطرِ کلامِ خُدا و بخاطرِ محکم بودو دَ
شاهدی که قبول کدد، کُشته شدد.^{۱۰} اونا قد آواز بلند چیغ
زده مُوگفت: "آی خُداوند قادرِ مطلق، قُدوس و بَرق، تا کَی
قضايا نمونی و إنْتقامِ خون مو ره از باشنده های رُوی زمی
نمیگیری؟"^{۱۱} اوخته بلده هر کدم ازوا یگ کالای سفید دَد
شد و دزوا گفته شد که کم دیگه ام آرام کنه تا تعدادِ همکارا
و بِرارون ازوا که رقم ازوا کُشته مُوشه، پُوره شنه.

و دیدم که او مُهر ششم ره واز کد و یگ زلزله قوی رُخ دَد
و آفتَو رقمِ پلاسِ درشت سیاه شد و ماه کاملاً رقمِ خون الی
سرخ شد^{۱۲} و ستاره های آسمو دَزمی ریخت، رقمی که درخت
انجیر از بادِ شدید شور مُخوره و میوه های نارسیده خُوره
میریزنه.^{۱۳} آسمو رقم یگ طومار پیچنده شده جَم شد و هر کوه
و جزیره از جای خُوب رده شد.^{۱۴} اوخته پادشاهیون زمی، آدمای
نامتو، قومدانان، دولتماندا و قدرتماندا و هر غلام و هر نفر آزاد
خود ره دَغارها و دَبین قاده های کوه ها تاشه کده^{۱۵} دَکوه
ها و قاده ها گفت: "دَبله مو بُفتید و مو ره از چهره امزُو که

دَ بَلِه تَخت شِشْتَه وَ از غَصَبِ باره تاشه كُنید، ^{١٧} چراكه روزِ
بُزُرگِ غَصَبِ ازوا رسِيده وَ كِي مِيتنه كه دَ برابر شى ايسته
”شُنه؟“

يگ صد و چل و چار هزار

^٧ بعد ازو ديدم که چار ملايکه دَ چار گوشِه زمى ايسته
يَه، دَم رُوي چار بادِ زمى ره مِيگِيره تا باد دَ بَلِه زمى و دَ بَلِه
دریا و دَ بَلِه هیچ درخت پُف نَكُنه. ^٨ اوخته يگ ملايکه دِيگه
ره ديدم که از جای آفتَو بُر شُدو باله مبييه و مُهر خُدای زنده ره
قد خُو دَره. او دَ امزُو چار ملايکه که دَزوا قُدرت دَده شُدد تا
دَ زمى و دریا ضَرَر بِرسَنه، قد آوازِ بلند گفت: ^٩ ”تا زمانی که
مو دَ پیشانِه خِدمتگارای خُدای خُو مُهر نَزَدَه، دَ زمى و دَ
دریا و دَ درختا ضَرَر نَرسَنید.“ ^{١٠} اوخته تعدادِ کسای ره که مُهر
شُدد شِنِيدم: از تمامِ طايِفه های بنى إسرائيل يگ صد و چل و
چار هزار نفر مُهر شُد:

^٥ از طايِفه يهودا دوازده هزار نفر مُهر شُد.
از طايِفه رئوبين دوازده هزار نفر مُهر شُد.

از طایفه جاد دوازده هزار نفر مُهر شد.

از طایفه آشیر دوازده هزار نفر مُهر شد.^۶

از طایفه نفتالی دوازده هزار نفر مُهر شد.

از طایفه منسی دوازده هزار نفر مُهر شد.

از طایفه شمعون دوازده هزار نفر مُهر شد.^۷

از طایفه لاوی دوازده هزار نفر مُهر شد.

از طایفه یسّاکار دوازده هزار نفر مُهر شد.

از طایفه زیولون دوازده هزار نفر مُهر شد.^۸

از طایفه یوسُف دوازده هزار نفر مُهر شد.

و از طایفه بنیامین دوازده هزار نفر مُهر شد.

گروه کله قد کالاهای سفید

بعد ازی دیدم که اوته، یگ گروه کله که هیچ کس اونا ره حساب کده نمیتنست، از هر ملت و طایفه و قوم و زیو د پیش روی تخت و د حضور باره ایسته شد؛ د جان ازوا کالای سفید و د دستای ازوا شاخچه های درخت خرما بود و اونا د آواز بلند چیغ زده مُوگفت:

”نجات دَ خُدای مو تعلق دَره“

”که دَ بَلِه تَخت مِيشِينه و دَ بارِه.“

۱۱ تمامِ ملايكه ها دَ گِرداگِردِ تَخت و دَ گِرداگِردِ بُزُرگا و چار
مَوْجُود زِنده ايسْتَه بُود و اونا دَ پِيشِ تَخت رُوى دَ خاك افتَد و
۱۲ خُدا ره سَجده کده گُفت:

”آمين!“

ستايش و جلال،

حِكمت و شُكرگزاری،

حرمت و قُوت و قُدرت

از خُدای مو باد، تا آبدالآباد. آمين.

۱۳ اوخته يكى امزُو بُزُرگا از مه پُرسان کده گُفت: ”امى سفيد
پوشَا كِي أَسْتَه و از كُجا أَمَدَه؟“ ۱۴ ما دَز شى گُفتم:
”صاحب، خود تُو مِيدَنى!“ اوخته او دَز مه گُفت: ”آميا
كسای أَسْتَه که از عذابِ سخت خلاص شُده و كالاي خُوره

شُشته و دَخُون باره سفید کده. ^{۱۵} امی خاطر اونا دَپیشِ

رُوی تَختِ خُدا آسته و شاو و روز او ره دَخانه شی عِبادت
مُونه و امُو که دَبله تَخت شِشته، اونا ره دَتَّی خَیْمَه خُو جای
داده. ^{۱۶} اونا دِیگه هرگز گُشنه و تُشنه نَمُوشَه و آفتَو اونا ره
نَمِیزَنه و نَه ام کُدم گرمی سخت دَبله ازوا مییه. ^{۱۷} چُون باره
که دَمینکلِ تَخت ایسته يَه، چوپون ازوا مُوشَه و اونا ره سُون
چشمِه های آبِ حیات هِدایت مُونه و خُدا تمام آودیده ها ره از
چیمای ازوا پاک مُونه. ”

مهرِ هفتُم

﴿ وختیکه باره مُهرِ هفتُم ره واز کد، تقریباً نیم ساعت دَ
عالِم باله خاموشی برقرار شُد. ^۲ و ما امُو هفت ملایکه ره دِیدُم
که دَحُضُورِ خُدا ایسته يَه و دَزوا هفت شیپور دَده شُد. ^۳ اوخته
یگ ملایکه دِیگه آمده دَپیشِ قُربانگاه ایسته شُد و او یگ
آتشدانِ طِلایی داشت. دَمزُو ملایکه بُخورِ خوشبوی کلو دَده
شُد تا او ره قد دُعاهاي تمام مُقدَّسین دَبله قُربانگاهِ طِلایی که
دَپیشِ رُوی تَخت آسته، تقدیم کُنه. ^۴ و دُود بُخورِ خوشبوی قد
دُعاهاي مُقدَّسین از دِستِ ملایکه دَحُضُورِ خُدا باله رفت.

بعد ازو ملایکه آتشدان ره گرفته از آتشِ قربانگاه پُر کد و د
بله زمی پورته کد. اوخته گرگ دراغ، آوازها، آتشکها و
زلزله پیدا شد.

هفت شبپور

پس امو هفت ملایکه که هفت شبپور دشت، آماده شد تا اونا
ره د صدا بیره. ^۹ اوخته ملایکه اول شبپور ره د صدا آورد و
زاله و آتش قد خون قتی تاه آمد و د بله زمی بارید و یگ
سوم زمی و یگ سوم درختا و تمام علفای سوز ره سوختند.
و ملایکه دوم شبپور ره د صدا آورد و یگو چیز رقم کوه کله
که د آتش موساخت د دریا آندخته شد و یگ سوم دریا د خون
تبديل شد ^{۱۰} و یگ سوم زنده جانای دریایی مرد و یگ سوم
کشتنی ها نابود شد. ^{۱۱} ملایکه سوم شبپور ره د صدا آورد و
یگ ستاره کله رقم مشعل دار دده شده از آسمو تاه آمد و د بله
یگ سوم دریاها و چشمehای آو افتاد. ^{۱۲} نام امزو ستاره
افستین بود. یگ سوم آوها کلو تلخ شد و غدر مردم از
خاطر آوهای تلخ شده مرد. ^{۱۳} ملایکه چارم شبپور ره د صدا
آورد و یگ سوم آفتاو و یگ سوم ماهتو و یگ سوم ستاره ها
زده شد، د اندازه که یگ سوم ازوا تریک شد و یگ سوم روز

و يېگ سِوْم شاو بے روشنی مَند.^{۱۳} و دَ حَالِيَّكَه تُوكْ مُوكْدُم،
شِنِيدُم که يېگ بُرْجَج دَ حِينِ پَرواز دَ مِينِكَلِ آسمو دَ آواز بِلَند
مُوگِيَه: "واى، واى، واى دَ حَالِ باشِنَدَه هَای زَمَى، بخاطِرِ
آوازِ شِيپُور هَای امْزُو سِه مِلايَّكَه که أُونَا دَ زُودَى دَ صَدا
مِيرَه." ^{۱۴}

٩ ^۱ وختى مِلايَّكَه پَنْجُم شِيپُور ره دَ صَدا أُورَد، ما يېگ سِتَارَه
ره دِيدُم که از آسمو دَ زَمَى اُفتَد و كِلى چَاه بَسَ آخر بَلَدِه اُزو
دَدَه شُد. ^۲ او دَانِ چَاه بَسَ آخر ره واز کَد و از چَاه يېگ دُود رقمِ
دُودِ تنُورِ كَنَه بُرْ شُد و آفَتو و هَوا دَ وسِيلَه دُودِ چَاه تَرِيك شُد.
^۳ و از مِينِكَلِ دُود مَلَخ هَا دَ بَلَه زَمَى آمَد و بَلَدِه ازوا قُدرَتَى
دَدَه شُد که رقمِ قُدرَتِ دُمَكَجَكَاي زَمَى بُود. ^۴ بَلَدِه ازوا گُفَتَه
شُد که دَ عَلَفَاي زَمَى و گِيَاه هَاي سَوْز و دِرخَتا ضَرَر نَرَسَنه،
بَلَكِه فقط دَ امْزُو مرْدُما ضَرَر بِرسَنه که مُهِرِ خُدا ره دَ پِيشَانِي
خُو نَدرَه. ^۵ بَلَدِه ازوا إجازَه كُشتُونِ مرْدُما دَدَه نَشَد، بَلَكِه دَزا
فقط إجازَه دَدَه شُد که أُونَا ره مُدَاتِ پَنج مَاه عَذَاب كُنه و
عَذَابِ ازوا مِثَلِ دَرَد-و-سَوْز نِيشِ دُمَكَجَك بُود که يېگ نَفر ره
نِيش مِيزَنه. ^۶ دَ امْزُو روزَا مرْدُم مَرَگ طَلب مُونَه، ليكِنْ پَيدَا
نَمِيتَه، دَ آرزوِي مُرْدو أَسْتَه، ولَئِ مَرَگ ازوا دُوتَا مُونَه.

شکلِ امْزُو مَلَخٍ هَا رقمِ أَسْپَهَايِ بُودَ كَه بَلَدِه جَنَگَ آمَادَه

شُدَه بَشَه. دَبَلِه سِرِ ازوا يِگَ چِيزِ رقمِ تاجِ طِلَّاَيِ الَّى بُودَ و

چِهرَه هَايِ ازوا رقمِ چِهرَه إِنسَان. مُؤْمَنِي هَايِ ازوا رقمِ مُؤْمَنِي

خاتُونُو الَّى و دَنَدونَيِ شَيِّي مِثْلِ دَنَدونَيِ شَيِّرِ الَّى بُودَ. أُونَا

زِرِه هَا رقمِ زِرِه هَايِ آيَنِي دَشَتَ و آوازِ بالِ هَايِ ازوا رقمِ آوازِ

گَادَى هَايِ جَنَگَى كَلَو بُودَ كَه قَدَ أَسْپَهَا دَجَنَگَ مُؤَدَّوَه.

أُونَا رقمِ دُمَكَجَكَ هَا الَّى دُمَ و نِيشَ دَشَتَ و دَدُمَ ازوا

قُدرَتَ بُودَ كَه مرُدُمَ رَه بَلَدِه پَنَجَ مَاهَ عَذَابَ كُنَه. أُونَا دَبَلِه

خُويِگَ پَادِشاَه دَشَتَ كَه أُو مَلَيِّكَه چَاهَ بَسَ آخرَ بُودَ كَه دَزِيونَ

عِبرَانِي نَامِ ازُو «آبَدَوْن» أَسْتَهَ و دَيُونَانِي أُو رَه «آبُولِيون»

مُؤَكَه. «وايِ» اوَّلَ تِيرَ شُدَه. اينَه، دُو «وايِ» دِيَگَه هَنَوزَ

مَنَدَه كَه بَعْدَ ازِي مِيَيهَ.

مَلَيِّكَه شَشْمَ شَيِّپُورَ رَه دَصَداَ أَوْرَدَ و ما يِگَ آوازَ رَه ازَ

مِينَكَلِ چَارَ شَاخِ قُربَانَگَاهِ طِلَّاَيِ كَه دَحْضُورِ خُداَ أَسْتَهَ،

شِنِيدُمَ. و امُو آوازَ دَامْزُو مَلَيِّكَه شَشْمَ كَه شَيِّپُورَ دَشَتَ

گَفتَ: «امُو چَارَ مَلَيِّكَه رَه كَه دَدِريَيِ كَلَه فَراتَ دَبَندَ أَسْتَهَ،

خَلاَصَ كُو.» پَس امُو چَارَ مَلَيِّكَه كَه بَلَدِه امزِي ساعَتَ و

روزَ و مَاهَ و سَالَ آمَادَه نِگَاهَ شُدَّدَ، خَلاَصَ شُدَه تَا يِگَ سِوَمَ بَشَرَ

ره بُكْشه.^{۱۶} تِعدادِ لشکر سَوارِه ازوا دُو صد مِيلیون نفر بُود؛

ما تِعدادِ ازوا ره شِنیدم.^{۱۷} آسپ‌ها و سَوارای ره که ما د

رویای خُو دِيدم، اینی رقم معلوم مُوشد: زِره‌های ازوا رنگِ آتشی و کَبُود و زَرد گوگردی داشت. سرِ آسپ‌ها رقم سرِ شیر آلی معلوم مُوشد و از دانِ ازوا آتش، دُود و گوگرد بُر مُوشد.

دَ وسیله امزی سِه بَلا يعني آتش، دُود و گوگرد که از دانِ ازوا بُر مُوشد، يگ سِوم بَشر کُشته شد.^{۱۸} چون قدرتِ آسپ

ها دَ دان و دُم ازوا بُود؛ دُم‌های ازوا مثل مار‌های آسته که سر دَره و قد ازوا نیش مِيزنه.^{۱۹} باقی بَشر که دَ وسیله امزی

بَلا‌ها کُشته نَشد، هنوز ام از کارای دِست خُو توبه نَکد و پَستِش کدونِ جنیات و بُت‌ها ره ایله نَکد، پَستِش بُت‌های طلایی، نقره‌یی، برنجی، سنگی و چوبی ره که قدرتِ دیدو و

شِنیدو و راه رفتو ره نَداشت.^{۲۰} امچنان اونا از آدمکُشی و جادوگری و زِناکاری و دُزی توبه نَکد.

ملایکه و طومارِ ریزگَگ

۱۰ اوخته يگ ملایکه قُدرتمندِ دِیگه ره دِيدم که از آسمو تاه مییه. او قد آور پوشنده شُدد و دَ بَله سر شی رنگین کَمو

بُود. چهِرہ اُز و رقمِ آفتَوَ الّی و پایای شی رقمِ سُتُون های آتش بُود. ^۲ او دِست خُویگ طومارِ ریزگگ واز شُدہ دَشت. او پای راست خُوره دَدریا و پای چپ خُوره دَبله زمی ایشت ^۳ و دَآوازِ بلند رقمِ غُرشِ شیر چیغ زَد و غَیتیکه چیغ زَد، هفت گُرگُدراغ آواز خُوره بُر کد. ^۴ بعد اُز که هفت گُرگُدراغ آواز خُوره بُر کد، ما آماده شُدم که نوِشته کُنم، لیکن یگ آواز از عالم باله شنیدم که مُوگفت: "چیزای ره که هفت گُرگُدراغ گفت مهر کُو و اونا ره نوِشته نَکُو."

^۵ اوخته اُمو ملایکه ره دیدم که دَبله دریا و زمی ایسته بُود. او دِستِ راست خُوره سُون آسمو باله کد ^۶ و دَنامِ امزُو که تا آبدالاباد زِنده یه و آسمو ره قد تمامِ چیزای که دَمنه شی آسته و زمی ره قد تمامِ چیزای که دَمنه شی آسته و دریا ره قد تمامِ چیزای که دَمنه شی آسته خلق کده، قسم خورد و گفت: "دیگه طال نموخوره، ^۷ بلکه دَامزو روزای که ملایکه هفتم شیپُور ره دَصدا میره، رازِ خُدا تکمیل مُوشه، اُمو رقم که دَخدمتگارای خُو یعنی دَپیغمبرا خبر دده بُود."

^۸ اوخته اُمو آوازی ره که از عالم باله شنیده بُودم، بسم قد مه گپ زَدہ گفت: "بورُو، طومارِ واز شُدہ ره از دِستِ ملایکه که

دَبَلَه دریا و زمی ایسته يه، بِکَیر. ”^٩ و ما دَپیشِ ملایکه

رفتُم و دَزُو گُفتُم که طومارِ ریزگَگ ره دَز مه بِدیه. او دَز مه

گفت: ”ای ره بِکَیر و بُخور. ای مَنِه کَورِه تُو ره تَلخ مُونه،

لیکِن دَدان تُو رقمِ عسل وَری شِیرین مَزه مِیدیه.“ ^{١٠} پس

طومارِ ریزگَگ ره از دِستِ ملایکه گِرفته خوردم. او دَدان مه

رقمِ عسل وَری شِیرین بُود، مَكْم وختیکه او ره قُورت کُدم،

مَنِه کَورِه مه تَلخ شُد. ^{١١} اوخته دَز مه گفت: ”تُو باید بسم دَ

بارِه قَوم ها، مِلَّت ها، زِيونا و پادشايونِ کَلو پیشگویی کنی.“

دو شاهِ خُدا

١١ بعد ازو بَلَدِه مه يگ نَى دَدَه شُد که رقمِ چیو اندازه

گیری بُود و دَز مه گفتَه شُد: ”باله شُو و خانِه خُدا و قُربانگاه

ره اندازه بِکَیر و تِعدادِ کسای ره که دَأونجی عِبادت مُونه

حساب کُو. لیکِن حَولی بُرونِ خانِه خُدا ره ایله بِدی و او ره

اندازه نَگِير، چراکه او بَلَدِه مِلَّت ها دَدَه شُدَه و اونا بَلَدِه چَل و

دو ماه شارِ مُقدَّس ره پایمال مُونه. ^٣ و ما دَدو شاهِ خُو که

کالای پلاسی پوشیده، قُدرت-و-اختیار مِیدیم که مُدتِ يگ

هزار و دُو صد و شصت روز نَبَوت کُنه.“ ^٤ آمیا دُو درختِ

زیتون و دو چراغدان آسته که د حضور خداوند عالم ایسته

مُوشه.^۵ اگه کدم کس بخایه که دزوا ضرر پرسنه، آتش از دان
ازوا بُر مُوشه و دشمنای ازوا ره قورت مونه؛ و هر کسی که
قصد کنه دزوا ضرر پرسنه باید امی رقم کشته شنه.^۶ امیا
قدرت-و اختیار دره که آسمو ره بند کنه تا د دورون روزای که
نبوَت مونه بارش نباره. امچنان امیا د بله آو ها قدرت-و-
اختیار دره که اونا ره د خون تبدیل کنه و هر غیتیکه بخایه،
زمی ره د هر رقم بله گرفتار کنه.

و زمانی که اونا شاهدی ددون خو ره خلاص کنه، «جانور
وحشی» که از چاه بے آخر بُر مُوشه قد ازوا جنگ مونه و د بله
ازوا پیروز مُوشه و اونا ره مُوكشه.^۷ جسد های ازوا د سرک
عمومی شار کله پورته مُوشه که بطور کنایه «سدهم» و
«مصر» گفته شده، د امزوجای که مولای ازوا ام د صلیب
میخکوب شد.^۸ مدت سه و نیم روز مردم از هر قوم و طایفه
و زیو و ملت جسدای ازوا ره توخ مونه و اجازه نمیدیه که اونا
د قبر ایشته شنه.^۹ باشنده های رُوی زمی بخاطر ازوا خوشی
مونه و جشن گرفته د یگدیگه خو تُحفه ریی مونه، چراکه امی
دو پیغمبر باشنده های رُوی زمی ره د عذاب کدد.^{۱۰} لیکن

بعد از سِه و نیم روز، روح حیات از جانبِ خُدا دَ جَسَد های ازوا دَرَأَمَد و اُونا سِر پایای خُو ایسته شُد و کسای که اُونا ره دِید، سخت ترس خورد.^{۱۲} اوخته اُونا از عالم باله یگ آوازِ پلنند ره شِنید که دَزْوا گفت: "دَ اینجی باله بِپید." و دَ حالیکه دُشمنای ازوا توخ مُوكد اُونا د آور سُون آسمو باله رفت.^{۱۳} دَ امزُو ساعت یگ زلزله قوی رُخ دَد که دَهُم حِصَه شار تباہ شُد و هفت هزار نفر دَ امزُو زلزله از بَین رفت و کسای که باقی مَنْدَد، ترس خورده خُدای آسمو ره حمد-و-ثنا گفت.^{۱۴} «وای» دَوْم تیر شُد؛ اینه، «وای» سِوم دَزُودی مییه.

شیپُورِ هفتُم

وختیکه ملایکه هفتم شیپُور ره دَ صَدا اُورد، آواز های پلنند دَ آسمو شِنیده شُد که مُوگفت: "پادشاهی دُنیا از خُداوند مو و از مسیح ازو شُد و او تا آبَدالْبَاد پادشاهی مُونه."^{۱۵} و امو

بیست و چار بُزرگ که دَ حُضُورِ خُدا دَ بَلَه تَخت های خُو

شِشْتُد، رُوى دَ خاک افتَدَه خُدا ره پَرَستِش کد^{۱۶} و گفت:

"تو ره شُکر-و-سِپاس مُوگی آی خُداوند-خُدای قادرِ مُطلق که أَسْتَى و بُودَى،

چراکه تُو قُدرتِ بُزُرگ خُو ره دَ دِست گِرفتے و دَ پادشاهی
کدو شُروع کدے.

۱۸ مِلَّت ها قار شُد و غَضَبِ ازْتُو آمد.

آلی زمانی رَسِیده که مُرده ها ره قضاوت کُنی

و دَ خِدمتگارای خُو يعني دَ پَیغمبرا

و دَ مُقدَّسین و دَ کسای که از نام تُو مِیترسه،

چی ریزه و چی کله، آجر بِدی

و کسای که زمی ره تباہ مُونه، اُونا ره نابُود کُنی.

۱۹ اوخته خانه خُدا دَ عالِم باله واز شُد و صندوقِ عهدِ خُدا دَ
مَنِه خانه شی دیده شُد و دَ اُونجی آتِشک، آواز ها،
گُرگُردارغ، زِلزله و زاله شَدید رُخ دَد.

خاتُو و اژدار

^۱ بعد اُزو يگ علامت بُزُرگ د آسمو ظاهِر شد: يگ

خاتُو قد آفتَو پوشَنده شُدد و ماهَتَو د زير پايای شى بُود و د سر خُويگ تاج از دوازده سِتاره دشت. ^۲ او شِكامتُو بُود و از درد زيدو و عذابِ أولاد پيَدا کدو ناله-و-فریاد مُوكد. ^۳ بعد اُزو يگ علامتِ دِيگه د آسمو دیده شد: د أونجى يگ آژدار كِتَه سُرخ رنگ بُود که هفت سر و ده شاخ دشت و دَبَلَه هفت سر شى هفت تاج بُود، ^۴ و دُم اُزو يگ سِوم سِتاره هاي آسمو ره جم کد و د زمي پورته کد. اوخته آژدار د پيشِ رُوي امزُرو خاتُون که د حالِ زيدو بُود، ايسته شُد تا امي که باچه اُزو پيَدا شنه، باچه شى ره قُورت کُنه. ^۵ اوخته امو خاتُو يگ باچه زيد که او قد تياقِ آينى دَبَلَه تمامِ مِلَّت ها حُكمانى مُونه؛ و باچه اُزو د حُضورِ خُدا و تَخت شى بُرده شد. ^۶ و خود خاتُو د ببابو دُوتا کد، د يگ جاي که از طرفِ خُدا بَلِدَه شى آماده شُدد تا مُدتِ يگ هزار و دُو صد و شصت روز د أونجى اُزو نِگاهداري شنه.

اوخته د آسمو جنگ دَر گرفت. مِيكائيل و ملايكه هاي شى قد آژدار جنگ کد و آژدار و ملايكه هاي اُزو ام قد ازوا جنگ کد. ^۷ ليکِن آژدار نَتَنِست پيروز شنه و دِيگه بَلِدَه ازوا د آسمو

جای نَمَند. ^۹ آژدارِ کله تاه پورته شُد، اَرے اُمو مارِ قدِیمی که
نام شی اِبْلِیس و شَیطُو اَسْتَه و تمامِ دُنیا ره گُمراه مُونه، د
زمی پورته شُد و ملایکه های اُزو قد شی قتی پورته شُد.

^{۱۰} اوخته يگ آوازِ بلند ره از آسمو شِنییدم که مُوگفت:

”آلی نِجات و قَوْت و پادشاهی خُدای مو

و قُدرتِ مسیح اُزو بَرَمَلا شُد،

چُون مُدعی بِرارون مو

که شاو و روز دَ حُضُورِ خُدا دَ بَلَه ازوا تُهمَت مُوكد،

تاه پورته شُد.

^{۱۱} أُونا دَ وسِیلَه خُونِ باره

و دَ وسِیلَه تورِه شاهِدی خُو دَ بَلَه اُزو پیروز شُد،

چُون أُونا زِندَگی خُو ره دَ اندازِه دوست نَدشت که از مَرگ
پِترسه.

۱۲ پس آی آسمونا و باشِنده های شی،

خوشی گُنید!

لیکِن وای دَ حال شُمو، آی زمی و دریا،

چراکه إبلیس قد خَشم-و-قارِ کلو دَ بَلَه شُمو تاه آمدہ،

چون او مِیدَنَه که وخت شی کم آسته. ”

۱۳ وختی آژدار دید که دَ زمی پورته شده، او پُشتِ امزُو خاتُو

ره گِرفت که باچه زَيْدَد. ۱۴ لیکِن بَلَدِه خاتُو دُو بالِ بُرگِج کَنه

داده شُد تا دَ امزُو جای که دَ بیابو بَلَدِه شی آماده شُدد، پَرواز

کُنه، دَ جایی که بَلَدِه یگ زمان و زمان ها و نِیم زمان، دُور از

نظر مار از شی نِگاهداری مُوشَه. ۱۵ اوخته مار از پُشت خاتُو،

از دان خُو رقمِ دریا آو ایله کد تا سیل شی او ره گِرفته بُبره.

۱۶ مگم زمی دَ خاتُو کومَک کده دان خُو ره واز کد و دریای ره

که آژدار از دان خُو ایله کُدد، قُورت کد. ۱۷ اوخته آژدار دَ بَلَه

خاتُو قار شُد و رفت تا قد اولادای باقی مَنِدِه شی جنگ کُنه

که احکامِ خُدا ره دَ جای میره و شاهِدی عیسیٰ ره محکم

۱۸ پس آژدار دَ بَلَه ریگِ دریا ایسته شُد.

۱۳

اوخته دِیدُم که جانوَرِ وَحشى از دريا بُر مُوشه. او دَه شاخ و هفت سر داشت که دَبَلَه شاخای شى دَه تاج بُود و دَبَلَه سر های شى نام های كُفرآميزيز نوشتَه شُدد. ^۲ امُو جانوَرِ وَحشى ره که دِيدُم رقمِ پَلنگ بُود و پاپايى شى رقمِ پاپايى خرس و دان شى رقمِ دان شير. آژدار قُدرت و تَخت و اختياراتِ ڪلون خُوره دَزُو دَد. ^۳ يکي از سر های اُزو رقمى معلوم مُوشد که زَخمِ ڪشينده خورده بَشه، ولے امُو زَخمِ ڪشينده شى جور شُدد. تمام دُنيا حَيرَه و مَنْدُد و از پُشتِ امزُو جانوَرِ وَحشى مورفت. ^۴ مردم امُو آژدار ره که اختياراتِ خُوره دَجانوَرِ وَحشى دَده بُود پَرسِتِش کد و اونا امُو جانوَرِ وَحشى ره ام پَرسِتِش کد و گفت: "کَيِ مِثْلِ امْزِي جانوَرِ وَحشى أَسْتَه؟ كَيِ مِيَتَنَه دَضِيدِ ازِي جنگ کُنه؟" ^۵ بَلدِه اُزو يگ دان دَده شُدد که توره های پُركِبر و كُفرآميزي بُگيه و بَلدِه اُزو إجازه دَده شُدد که مُدتِ چَل و دُو ماہ از اختياراتِ خُوره استفاده کُنه. ^۶ او دان خُوره دَكُفرگويي واز کد تا دَضِيدِ خُدا، نام شى، جايگاهِ شى و تمامِ موجوداتِ که دَعالِم باله آسته کُفر بُگيه. ^۷ بَلدِه اُزو إجازه دَده شُدد که قد مُقدَّسِين جنگ کُنه و دَبَلَه ازوا زور شُنه و بَلدِه اُزو دَبَلَه هر

طایفه و قَوم و زِیو و مِلّت اِختیار دَدَه شُد. ^٨ و ما دِیدُم که تمام باشِنده های رُوی زمی امُو جانوَر وَحشی ره پَرستِش مُونه، تمام کسای که نام ازوا د شُروع پَیدایش عالم د کِتاب حَیات باره نوِشته نَشُدَه، یعنی د کِتاب حَیات باره که حلَال شُد. ^٩ هر کس که گوشِ شِنَوا دَرَه، گوش بِکِیره:

^{١٠} اگه قرار بَشَه که کُدم کس د اسِیری بوره،

او د اسِیری موره؛

اگه قرار بَشَه که کُدم کس قد شمشیر کُشته شُنه،

او قد شمشیر کُشته مُوشَه.

امینجی صَبر-و-حوصله و ایمان مُقدَّسین د کار آستَه.

جانوَر وَحشی دوّم

^{١١} اوخته يگ جانوَر وَحشی دِیگه ره دِیدُم که از زمی بُر مُوشَه. او رقم باره الّی دُو شاخ دَشت و رقم آژدار توره مُوگفت. ^{١٢} او تمام اِختیاراتِ جانوَر وَحشی اوّل ره د حُضُور شی د کار مُوبُرد

و زمی و باشِنده های شی ره و ادار مُوكد که جانورِ وحشی اول ره پَرستِش کُنه، امُوره که زَخمِ کُشنیده شی جور شُدد.^{۱۳} او مُعجزه های بُزرگ نِشو مِیدَد، حتیٰ دَپیشِ نظرِ مردم آتش ره از آسمو دَزمی بارَند.^{۱۴} او باشِنده های رُوى زمی ره دَوسِیله مُعجزه های گُمراه کد که بَلِدِه اُزوِ اجازه دَده شُد تا دَحُضُورِ جانورِ وحشی اول نِشو بِدیه. او امی کار ره کده دَزوا گفت که يگ مُجسمه جور کُنه، مُجسمه امزُو جانورِ وحشی ره که دَوسِیله شمشیر زخمی شُدد، ولے هنوز زِنده بُود.^{۱۵} دَجانورِ دومِ اجازه دَده شُد که دَمْجسمه جانورِ وحشی دَم بِدیه تا مُجسمه امزُو جانور توره بُگیه و تمامِ کسای ره که مُجسمه جانورِ وحشی اول ره پَرستِش نَمُوكد، بُکُشه.^{۱۶} امچنان او پگ ره و ادار کد، ریزه و کله، دَولتمَند و غریب، غُلام و آزاد ره که دَبَلِه دِستِ راست یا دَپیشانه ازوا نشان ایشته شُنه^{۱۷} تا هیچ کس نَتنه که خرید و فروش کُنه، بغیر از کسای که نشان دَره، یعنی نام یا عَدَدِ نام امزُو جانورِ وحشی ره دَره.

^{۱۸} دَاینجی حِکمت دَکار آسته: هر کس که دانایی-و-بینایی دَره، عَدَدِ جانورِ وحشی ره حِساب کُنه، چون ای عَدَدِ يگ آدم آسته و عَدَدِ شی شش صد و شصت و شش آسته.

١٤

بعد ازُو دِيدُم که اوته، باره دَ بَلِه کوهِ صَهْيُون ایسته
یه و قد ازُو قتی یگ صد و چل و چار هزار نفر دِیگه ام بُود
که نامِ باره و نامِ آته شی دَ بَلِه پیشانی ازوا نوشتہ بُود.

اوخته ما یگ آواز ره از آسمو شِنیدُم که رقمِ آوازِ آوهای کلو
و مِثِلِ آوازِ گُرگُر دراغِ قوی بُود. امُو آواز ره که شِنیدُم رقمِ
آوازی بُود که بَرْطَنَوازا آوازِ بَرْطَخُوره بُر کُنه. ^٣ اونا دَ پیشِ
رُوی تَخت و دَ حُضُورِ چار مَوْجُودِ زِنده و بُزُرگا سُرُودِ نَوَ

میخاند و هیچ کس نَتَنِست امُو سُرُود ره یادِ بِگیره، بَغَير از
امزو یگ صد و چل و چار هزار نفر که از زمی بازخرید شُدد.

^٤ امیا کسای اَسته که قد خاتُونو یگجای نَشُده، چون پاک دامو
اَسته. امیا هر جای که باره بوره، از پُشت شی موره. امیا از
مینکلِ انسان ها بَحَيثِ اوّلباری بَلِدِه خُدا و باره بازخرید شُد.
دَ دانِ ازوا هیچ دروغ پیدا نَشُد، چراکه اونا بَعَيْب اَسته.

سِه ملایکه

^٥ اوخته یگ ملایکه دِیگه ره دِيدُم که دَ مینکلِ آسمو پَرواز
مُوكد و خوشخبری آبدی ره قد خُدو دَشت تا او ره بَلِدِه کسای

اعلان کُنه که دَ رُوی زمی زِندگی مُونه، یعنی بَلِدِه هر مِلت و طایفه و زِیو و قَوم. ^٩ او دَ آوازِ بلند گفت: "از خُدا پَرسِید و او ره سِتایش کُنید، چُون ساعت شی رسِیده که او قضاوت کُنه. امُو که آسمو و زمی و دریا و چشمہ های آو ره پَیدا کده، او ره پَرسِتش کُنید!"

دَ امْزو غَیت یگ ملایکه دِیگه یعنی ملایکه دوّمی از پُشتِ ازو امَدَه گفت: "سَقْوط کد، باپلِ بُزرگ سَقْوط کد! امُو شارِ که پِگِ مِلت ها ره وادر کد تا از شرابِ دیونه کُننِدِه زِناکاری ازو وُچی کُنه سَقْوط کد." ^{١٠} اوخته ملایکه سِومی، از پُشتِ ازوا امَدَه دَ آوازِ بلند گفت: "هر کسی که جانورِ وحشی یا دَ مُجَسِّمه ازو ره پَرسِتش کُنه یا نشانِ ازو ره دَ بَلِه پیشانه یا دَ بَلِه دِست خُو قَبُول کُنه، ^{١١} او ام از شرابِ غَضَبِ خُدا که خالصِ استه و دَ پیله خَشم-و-قارِ خُدا شیو شُدَه، وُچی مُونه. او قد آتش و گوگرد دَ حُضُورِ ملایکه های مُقدَّس و دَ حُضُورِ باره عذابِ مُوشه ^{١٢} و دُودِ عذابِ ازوا تا آبدالآباد باله موره. کسای که جانورِ وحشی و مُجَسِّمه ازو ره پَرسِتش مُونه یا نشانِ نامِ ازو ره قَبُول مُونه، اونا شاو و روز آرامِش نَدره.

دَ اینجی صَبر-و-حوصله مُقدَّسین دَ کارِ استه که احکامِ خُدا

ره د جای میره و ایمان خو ره د عیسیٰ نگاه مونه.

^{۱۳} اوخته يگ آواز ره از آسمو شنیدم که گفت: "نوشته کو: نیک د بخت امزو کسای که بعد ازی د راه مولا مومره." و روح موگیه: "آرے، اونا از زحمتای خو آرام موشه، چون اعمال ازوا اونا ره دمبال مونه."

شروع کارِ دروگرا

^{۱۴} د امزو غیت دیدم که اونه، يگ آور سفید پیدا شد و د بله ازو يگ کس رقم «باقه انسان» ششتند که يگ تاج طلایی د سر خو و يگ داس تیز دست خو داشت. ^{۱۵} اوخته يگ ملایکه دیگه از خانه خدا برو آمد و آواز بلند د امزو کسی که د بله آور ششتند، گفت: "داس خو ره بدون و درو کو،" ^{۱۶} پس امو چون فصل درو رسیده و حاصل زمی پخته شده. حاصل زمی درو شد. ^{۱۷} بعد ازو يگ ملایکه دیگه از خانه خدا که د عالم باله آسته، برو آمد و او ام يگ داس تیز داشت. ^{۱۸} د امزو غیت يگ ملایکه دیگه از قربانگاه آمد که د بله آتش اختیار داشت و د آواز بلند د صاحب داس تیز گفت:

”داسِ تیز خُو ره بُدون و خوشه های انگور ره از تاگِ زمی جم
کُو، چراکه انگورای شی پُخته شده.“^{۱۹} پس امُو ملایکه داس
خُو ره دَ بَلَه زمی دَوند و انگورای زمی ره جم کده دَ چرخشت
کِلَه غَضَبِ خُدا آندخت.^{۲۰} اونا دَ مَنِه چرخشتی که بُرو از شار
بُود، قد پای لَغَه شُد و خُون از چرخشت جاری شده تا بِلَنْدَی
قَيْضَه دانِ آسپ دَ اندازِه شونزده صد دَورِه استَدِیْم رَبی شُد.

هفت ملایکه و هفت بَلَه

۱۵ بعد ازو یگ علامت بُزرگ و عجیب دیگه ره دَ عالم
باله دیدم: هفت ملایکه بُود که هفت بَلَه داشت که اونا بَلَه های
آخری بُود، چون قد امزوا غَضَبِ خُدا تَكَمِيل شُد.^{۲۱} اوخته یگ
چیز ره دیدم که رقم دریای شیشه که آتش خورده بشه، معلوم
مُوشد و کسای که دَ بَلَه جانورِ وحشی و مُجسمه شی و دَ بَلَه
عَدَدِ نامِ ازو پیروز شُدد، دَ بَغْلِ دریای شیشه ایسته بُود و بَرَبط
های خُدا دِستای ازوا بُود.^{۲۲} و اونا سُرُودِ مُوسی خدمتگارِ
خُدا و سُرُودِ باره ره میخاند و مُوگفت:

”کارای تُو بُزرگ و عجیب آسته،“

آی خُداوند-خُدای قادرِ مُطلق!

راه های تُو عادِلانه و حق آسته،

آی پادشاهِ مِلت ها.

آی خُداوند، کی آسته که از تُو نَترسه

و د نام تُو حمد-و-ثنا نَگیه؟

چُون تنها تُو مُقدَّس آستی

و تمامِ مِلت ها مییه

و د حُضور تُو پَرستِش مُونه،

چراکه کارای عادِلانه تُو بَرَملا شُده.

بعد ازی دیدُم که مُقدَّس‌ترین جای جایگاهِ صندوقِ شهادت د عالم باله واز شُد^۶ و از مُقدَّس‌ترین جای، هفت ملایکه قد هفت بَلَا بُرو آمد.^۷ اوخته یکی امزُو چار موجودِ زنده، دَ امزُو هفت ملایکه هفت پیله طِلَّابی دَد که پُر از غَضَبِ خُدای بُود که تا

آبَدْلَابَاد زِنَدَه يَهُه. ^۱ مُقَدَّسَتَرِين جَاهِي از دُودِ بُزْرَگَى-و-جَلَالِ خُدا
و از قُدرَتِ ازُو پُر شُد و هِيچِ كَس دَمُقَدَّسَتَرِين جَاهِي دَرَأَمَدَه
نَتَنِيَت تا غَيَّتِيَكَه هَفَت بَلَاهِي امْزُو هَفَت مَلَاهِيَكَه تَكَمِيل شُدَه.

هَفَت پَيَلَه غَضَبِ خُدا

^{۱۶} اوخته يَگ آوازِ بِلَند رَه از مُقَدَّسَتَرِين جَاهِي شِنِيدُم كَه دَ
امْزُو هَفَت مَلَاهِيَكَه مُوكَفت: ”بُورِيد و امْو هَفَت پَيَلَه غَضَبِ
خُدا رَه دَبَلَه زَمَى شَيَوْ كُنِيد.“ ^۲ پَس مَلَاهِيَكَه اوْلَى رَفَته پَيَلَه
خُو رَه دَبَلَه زَمَى شَيَوْ كَد و دَانَه هَاهِي بَدَرَنَگ و دَرَدَنَاك دَجانِ
مرَدَمَاهِي بُر شُد كَه نَشَانِ جَانَوَرِ وَحَشَى رَه دَجَسْم خُو دَشَت و
مُجَسِّمَه ازُو رَه پَرَسِتِش مُوكَد. ^۳ بَعْد ازُو مَلَاهِيَكَه دَوْم پَيَلَه خُو
ره دَدرِيَا شَيَوْ كَد و درِيَا رقمِ خُونِ مُرَدَه جَور شُد و تمامِ
زِنَدَه جَانَاهِي كَه دَدرِيَا بُود، مُرَد. ^۴ بَعْد ازُو مَلَاهِيَكَه سِوْم پَيَلَه خُو
ره دَدرِيَاچَه هَاهِي و چَشمَه هَاهِي آو شَيَوْ كَد و اُونَا خُونِ جَور شُد.
اوخته از مَلَاهِيَكَه كَه نِگَاهَوَان آو هَاهِي أَسْتَه شِنِيدُم كَه مُوكَفت: ^۵

”تُو عَادِل أَسْتَي، أَيْ قُدُوسَ كَه أَسْتَي و بُودَه،“

چُون امِي رقم قضاوت کَدَي؛

^۹ ازی که اونا خون مقدّسین و پیغمبرا ره ریختند،

تُو بَلِدِه ازوا خُون دَدِي تا وُچِي كُنه، چون اونا سَزوَار شَى
بُود. ”

^{۱۰} و شِنِيدُم که از قُربانگاه جواب آمده گفت:

”آرے، آی خُداوند-خُدای قادرِ مُطلق،

قضاؤت های تُو بَرْحق و عادِلانه أَسْتَه.“

^{۱۱} بعد اُزو ملايکه چارم پيله خُوره دَبَلِه آفَتو شيو کد و دَافَتو

قدُرت دَدَه شُد که مردم ره قد آتِش خُو بُسوَزَنَه. ^۹ مردم از
شِدَّتِ گرمی سوخت و دَنَامِ خُدای که دَبَلِه امزی بلا ها قدرت
دره، کُفرگویی کد و اونا توبه نَکَد و خُدا ره سِتایش نَکَد.

^{۱۰} بعد اُزو ملايکه پنجم پيله خُوره دَبَلِه تَختِ جانَوَرِ وَحشى

شيو کد و پادشاهی اُزو دَتِريکى غَرق شُد. مردمما از دَرَد-و-
رَنج زِيونای خُوره ميَخَيَيد ^{۱۱} و بخاطرِ درد ها و دانه های خُوره
خُدای آسمو کُفر مُوكَفت و از کاراي خُو توبه نَمُوكَد.

^{۱۲} بعد اُزو ملايکه شَشم پيله خُوره دَبَلِه دريای كِيَه فَرات

شيو کد و آوِ ازو خُشك شُد تا راه بَلِدِه پادشايونِ مشرق آماده
شُنه. ^{۱۳} اوخته دیدم که از دانِ آژدار و از دانِ جانورِ وحشی و
از دانِ پیغمبرِ دروغی سِه ارواحِ ناپاک رقمِ قوقری بُرو مییه.
آونا آرواحِ چنیات آسته که مُعجزه ها نِشو میدیه و دَ پیشِ
پادشايونِ تمامِ دُنیا موره تا آونا ره بَلِدِه جنگِ روزِ بُزرگِ خُدای
قادِرِ مُطلق جَم کُنه. ^{۱۵} - "اینه، ما رقمِ دُز مییم! نیک دَ بَختِ
کسی که بیدار مُومنه و کالا دَ جان خُو دَره؛ نَشنه که او لُچ
راه بوره و مردم شرمگاهِ ازو ره بِنگره." ^{۱۶} - پس امو سِه
اروحِ ناپاک، پادشايو ره دَ یگِ جای که دَ زیونِ عبرانی «هار
مَگیدون» مُوگیه، جم کد.

بعد ازو ملايکه هفتم پيله خُوره دَ هوا شيو کد ويگ آوازِ
بلند از مقدّسَتَرين جاي، از تَخت بُر شده گفت: "خلاص
شُد." ^{۱۸} اوخته آتشک ها، آواز ها و گُرگُدراغ ها پيدا شُد و
يگ زلزله قوى رُخ دَد، رقميکه از پيدايشِ إنسان دَ روی زمي
امي رقم زلزله قوى و شدید واقع نَشَد. ^{۱۹} شارِ بُزرگ دَ سِه
حصّه تقسيم شُد و شاراي مِلت ها بیرو شُد. خُدا بايُل بُزرگ ره
ياد کد و جامِ شرابِ غَضَب خُوره دَزو دَد. ^{۲۰} و تمامِ جزيره ها
گُم شُد و کوه ها پيدا نَشَد. ^{۲۱} از آسمو زاله های کنه دَ اندازه

شَش سِيرَ دَبَلَه مَرْدُم بَارِيد و مَرْدُم بَخاطِر امْزى زَالَه هَا دَخْدا
كُفَر مُوْگَفت، چراکه امی بَلَه كَلو سخت بُود.

فَاحِشَه كَلَه

١٧ اوخته امْزُو هفت ملايِكه که هفت پيله داشت، يگ شَيْ أَمَدَه دَزْ مَه گَفت: ”بيه که جَزَائِي امْزُو فَاحِشَه كَلَه رَه کَه دَبَلَه آو هَاي کَلو شِستَه، دَزْ تُو نِشو بِديْم. پادشايونِ دُنيا قد ازُو زِنا کَد و باشِنده هَاي رُوي زَمَى از شرابِ زِنَاي ازُو نِشه شُد.“ پس امُو ملايِكه مَره دَروح دَيگ بِيا بُو بُرد و دَأونجى يگ خاتُو رَه دِيدُم کَه دَبَلَه جانَورِ وَحشَى سُرخ رنگ سوار شُدد کَه جِسمِ جانَور پُر از نامِ هَاي كُفرآميْز بُود و هفت سر و دَه شاخ داشت. امُو خاتُو كالاي آرَغَوانِي و سُرخ رنگ دَجان خُو داشت و قد طِلَّا و دانه هَاي قِيمَتَى و مُرواري هَا مُزَين شُدد. او دَدِست خُو يگ پيله طِلَّاي داشت کَه پُر از بَدَكارِي و نِجاستِ زِنَاي شَي بُود. دَبَلَه پيشانِه ازُو اينى نام نوشتَه بُود کَه يگ راز آستَه: «بابُل بُزُرگ، آبه فَاحِشَه هَا و نِجاستِ زَمَى.» و ما دِيدُم کَه امُو خاتُو از خُونِ مُقدَّسيَن و از خُونِ شاهِدَاي عيسى نَشَه بُود و ما از دِيدونِ ازُو بَسَه اندازَه حَيرَه شُدد. ليكن

امُو ملایکه دَز مه گفت: "چرا حِیر و شُدے؟ ما رازِ خاتُو و رازِ امزُو جانوَرِ وَحشی ره که هفت سر و دَه شاخ دَره و خاتُو ره دَ بَلِه خُو مُوبِره دَز تُو بیان مُونم.^٩ امُو جانوَرِ وَحشی ره که دیدی، یگ زمان بُود، مَگم آلی نییه؛ او دَزُودی از چاه بَے آخر بُر مُوشہ و سُون نابُودی خُو موره. باشِنده های رُوی زمی که نَشده، از دیدون امزی جانوَرِ وَحشی حِیر و مُوشہ، چراکه او یگ زمان بُود، و آلی نییه ولے دَ آینده مییه.

دَ اینجی ذهنی دَ کار آسته که حِکمت دَشته بشَه: امُو هفت سر، هفت تِپه آسته که خاتُو دَ بَلِه شی شِشته. اُونا امچُنان هفت پادشاه آسته^{١٠} که پنج ازوا سقوط کده؛ یگ شی آسته و دیگِه شی هنوز نَمَدَه و غَیتیکه بییه، او باید بَلِه یگ مُدتِ کم بُمنه.^{١١} امُو جانوَرِ وَحشی که یگ زمان بُود و آلی نییه، او پادشاه هشتم آسته و دَ امزُو هفت تعلق دَره و سُون نابُودی خُو موره.^{١٢} و امُو دَه شاخ ره که دیدی، اُونا دَه پادشاه آسته که هنوز دَ پادشاهی نَرسِیده، لیکِن بَلِه ازوا اختیار دَده مُوشہ که مُدتِ یگ ساعت قد جانوَرِ وَحشی قَتی پادشاهی کُنه.^{١٣} امیا یگ مقصد دَره و قُدرت و اختیار خُو ره دَ جانوَرِ وَحشی

میدیه.^{۱۴} اونا د ضِدِ باره جنگ مُونه، لیکن باره د بَلَه ازوا پیروز مُوشه، چراکه او رَب-الارباب و شاه شاهان آسته و کسای که قد ازو قتی آسته کُوی شُده ها و إنتخاب شُده ها و وفادار آسته.“

بعد ازو ملایکه دَز مه گفت: “امو آو ها ره که دیدی، جای ره که فاحشه شِشته، اونا قوم ها، جماعت ها، مِلت ها و زیونا آسته.^{۱۵} و امو ده شاخ و جانور وحشی ره که دیدی، اونا از فاحشه بدبر مُوشه و او ره بیرو کده لُچ-و-لَق ایله مُونه؛ اونا گوشت ازو ره مُوخوره و او ره د آتش مُوسوزنه.^{۱۶} چون خُدا ای ره د دل های ازوا قرار دده که مقصد ازو ره پُوره کُنه و اتفاق کده پادشاهی خُو ره د جانور وحشی تسلیم کُنه تا کلام^{۱۷} خُدا پُوره شُنه. و امو خاتُو ره که دیدی، او شار بُزرگ آسته که د بَلَه پادشايون زمی حُكمرانی مُونه.”^{۱۸}

سُقوطِ شارِ بابل

بعد ازو یگ ملایکه دیگه ره دیدم که از آسمو تاه میبیه. او قدرت-و-اختیار کلو دشت و زمی از شِکوه-و-جلال

شی رو شو شد. ^۲ او د آوازِ بلند چیغ زده گفت:

”سقوط کد، بابل بزرگ سقوط کد!

او جای بود-و-باشِ جنیات جور شده،

پناهگاهِ هر روح ناپاک

و پناهگاهِ هر مُرغَکِ ناپاک و نَفَرَت آنگیز.

^۳ چون پگِ مِلت ها از شرابِ دیونه کُننیده زِناکاری ازو

وچی کده

و پادشايونِ دُنيا قد ازو زِنا کده

و تُجارتِ دُنيا از عیاشی کلونِ ازو دولتمَند شده.”

^۴ اوخته يگ آوازِ دیگه ره از آسمو شِنیدم که مُوگفت: ”آی

قوم مه، از مَنه ازو بُر شُنید، نَشْنَه که دَگَنَاه های ازو شریک

شُنید و بَلاهای شی دَبَلِه از شُمُو بییه، ^۵ چراکه گَنَاه های ازو تا

آسمو رسیده و خُدا شرارت های شی ره دَياد خُو آوردہ.

چیزی ره که او دَده، بَلَدِه شی پس بَدِید و مُطابِقِ اعمالِ ازو

دُوچند شی ره دَزُو پس بِدِید. دَ جامی که او گَث کده، دُو برابر
بَلِدِه شی گَث کُنید.^٧ دَ اندازه که او خود خُو ره شان-و-شَوکَت
داد و عیاشی کد، دَ امْزو اندازه او ره عذاب و غَم بِدِید، چراکه
دَ دِل خُو مُوگیه: ^٨ ما مِثِل مَلِکه شِشْتُم و بیوه نِبِیِّم و هرگز غَم
نَمِینگرم. ^٩ پس بَلاهای اُزو دَ یگ روز دَ بَلِه اُزو مییه، یعنی
مرگ و ماتم و قحطی؛ و او دَ آتش مُوسوژه، چون خُداوند-
خُدای که او ره قضاوت مُونه، قُدرتمند استه.

پادشايون زمی که قد شی زِنا کده و قد اُزو دَ عیاشی زِندگی^{١٠}
کده، وختی دُود سوختون اُزو ره بِنگره، دَ حال اُزو چخرا و
ماتم مُونه. ^{١١} اونا از ترسِ عذاب اُزو دور ایسته شده، مُوگیه:

وای، وای، آی شار بُزرگ! آی باُبل، آی شار زورتُو،

که دَ یگ ساعت جَزای تُو دَ بَلِه تُو آمد!

١٢ تُجارتِ دُنیا بَلِدِه اُزو چخرا و ماتم مُونه، چراکه دِیگه هیچ
کس مال-و-أسباب ازوا ره نَمیخَر، ^{١٣} نَه طِلّا و نُقره و سنگای
قِیَمتی و مُرواری های ازوا ره؛ نَه کتان نَرم و رَختِ ارغوانی و
آبریشم و رَختِ سُرخ رنگِ ازوا ره؛ نَه هر رقم چیو های

خوشبوی و رقم چیزای صَدَفَی و هر رقم چیزای چیو

قِیَمَتَی، بِرِنْجَی، آینَی و سنگِ مَرْمَرَی ازوا ره؛^{۱۳} نَه دارِچِینَی و
مَسَالِه دِیگ و عَطَرَهَا و مُر و كُنْدُر ازوا ره؛ نَه شَرَاب و
روغونِ زَيْتُون و بِهٰتِرِین آرد و گَنْدُم ازوا ره؛ نَه گَاو و گَوْسِپُو و
آسَپَهَا و گَادَیَهَا ازوا ره و نَه جِسْمَهَا و جَانَهَا إِنْسَان
ها ره.^{۱۴} أُونَا دَزُو مُوْكِيَه: 'أُمُو مِيَوَه' كَه جَانَ تُو دَآرْزَوِي شَى
بُود، از پیش تُو رفت و تمامِ شان و شَوَّكَت تُو از بَيْنَ رفت و
أُونَا دِیگَه هَرَگِز پَیَدا نَمُوشَه.^{۱۵} تُجَارَای امْزِي چِيزَا كَه امْزُو
شار دَولَتَمَند شُدَه، از ترسِ عذَابِ ازْوُ دُور اِيَسْتَه مُوشَه و
چَخْرَا و مَاتَمَ كَدَه^{۱۶} مُوكِيَه: 'واي، واي! آي شَارِ بُزْرَگ' كَه
كَالَّاِي كَتَانِ نَرَم و رَخْتِ أَرْغَوَانِي و سُرَخِ رَنَگ دَجانَ تُو بُود و
قد طِلَّا و دانَهَهَا قِيَمَتَی و مُرْواَرَی هَا مُزَيَّن بُودَي!^{۱۷} دَيگ
ساعَتِ امِيقَس دَارِايِي كَلَوَي تُو از بَيْنَ رفت!^{۱۸}

و تمامِ كِشتَي وانا و مُسافِرَايِي كِشتَي، خِدمَتَگَارَايِي كِشتَي و
پَگ كَسَايِي كَه كَار-و-بار شَى دَدرِيَا بُود، دُور اِيَسْتَه شُد^{۱۹} و
غَيْتِي كَه دُودِ سوختَوْنِ ازْوَ ره دِيد، أُونَا فَرِيَادَ كَدَه گُفت: 'كَدَم
شار رقمِ امْزِي شَارِ بُزْرَگ الَّى بُودَه؟'^{۲۰} و أُونَا خَاك دَسَرْ خُو
آنَدَخْتَه چَخْرَا و مَاتَمَ كَد و چِيغَ زَدَه گُفت: 'واي، واي دَحالِ

شارِ بُزُرگ که دَ اونجی تمامِ کسای که دَ دریا کِشتی دَشت، از
دارایی شی دَولتمَند شُد! او دَ یگ ساعت بیرو شُد! ^{۲۰} آی
آسمو، بَلده نابُودی اُزو خوشی کُو! آی مُقدَّسین و رسُولا و
پیغمبرا خوشی کُنید! چراکه خُدا دَ حق شُمو دَ ضِدِ اُزو
قضاياً کد. ”

^{۲۱} اوخته یگ ملایکه قُدرتمَند، یگ سنگ ره که رقمِ سنگِ
آسیا الی کله بُود گِرفته دَ دریا پورته کد و گفت: ”امِيطور قد
شِدَت شارِ بُزُرگِ باُبُل سرنگون مُوشہ و دِیگه هرگز پیدا
^{۲۲} آوازِ بَریطَنَوازا و بَیت خانا و تولهچی ها و
شیپُورنَوازا دِیگه هرگز دَز تُو شِنیده نَمُوشہ و هیچ صنعتگر از
هیچ کِسب دِیگه هرگز دَز تُو پیدا نَمُوشہ. آوازِ سنگِ آسیا
دِیگه هرگز دَز تُو شِنیده نَمُوشہ. ^{۲۳} روشنی چراغ دِیگه هرگز
دَز تُو روشنی نَمِیدیه و آوازِ بیری و داماَد دِیگه هرگز دَز تُو
شِنیده نَمُوشہ، چراکه تُجاري تُو دَ بَلَه مردمای دُنيا باداري کد
و دَ وسیله جادوگری تُو تمامِ مِلت ها گُمراه شُد ^{۲۴} و دَز تُو خونِ
پیغمبرا و مُقدَّسین و تمامِ کسای که دَ رُوى زمی دَ قتل رسید،
پیدا شُد. ”

خوشی د عالم باله

۱۹ بعد ازی چیزا یگ آوازِ بلند ره شنیدم که رقم آوازِ
جمعیتِ کنه الی د عالم باله مُوگفت:

”حمد-و-ثنا د خداوند!

نجات و جلال و قدرت از خدای مو آسته،

۲ چراکه قضاوتِ ازو درست و عادلانه يه.

او د بله فاحشه کنه قضاوت کد،

که دنیا ره قد زناکاری خو فاسد کده.

” او إنتقامِ حونِ خدمتگارای خوره ازو گرفت.

۳ أونا بسم گفت:

”حمد-و-ثنا د خداوند!

” دود شارِ باطل تا آبداللاباد باله موره.

اوخته امُو بِیست و چار بُزْرگ و چار مَوْجُود زِنده رُوی دَ
خاک افتَدَه خُدا ره که دَبَلَه تَخت شِشْتُد، سَجَدَه کد و گُفت:

”آمین، حمد-و-ثنا دَ خُداوند!

^۵بعد ازُو از تَخت يَگ آواز بُر شُد که مُوگُفت:

”خُدای مو ره حمد-و-ثنا بُكِيَد،

آی تمامِ خِدمتگارای ازُو،

آی تمامِ کسای که ازُو ترس دَرِید،

”چی ریزه و چی کله.

^۶دَ امزُو غَیت يَگ چِیز ره شِنیدُم که رقمِ آوازِ جمعیَتِ کله بُود،
رقمِ آوازِ آوهای کَلو و رقمِ آوازِ گُرگُدراغ های قَوی که
مُوگُفت:

”حمد-و-ثنا دَ خُداوند!

خُداوند-خُدای مو،

امو قادر مُطلق پادشاهی مُوکنه.

^٧ بیید که شادی و خوشحالی کنی

و او ره بُزرگی-و-جلال بدی!

چون زمان توی باره رسیده

و بیری شی خود ره آماده کده؛

^٨ دَرْزُو إِجازَة دَدَه شُدَّه

تا کتان نرم و روشو و پاک بپوشه.”

مقصد کتان نرم اعمال نیک مقدسین استه.

^٩ اوخته ملایکه دز مه گفت: ”نوشته کو: نیک د بخت کسای

که د مهمانی توی باره دعوت شده!“ او امچنان دز مه گفت:

”اینمیا کلام حقيقة خدا آسته.“ ^{١٠} و ما د پیش پای شی

افتدم تا او ره سجده کنم، لیکن او دز مه گفت: ”ای کار ره

نکو! ما قد ازتو و قد براون تُو که د باره عیسی مسیح

شاهیدی میدیه، همکار آستم. تنها خدا ره سجده کو! چون

شاهدی عیسیٰ روح نبُوت آسته. ”

۱۱ اوخته دیدم که آسمو واز شد و د اونجی یگ آسپ سفید بود
که نام سوارشی «آمین» و «حق» بود؛ او قد عدالت قضاوت
مونه و جنگ موکنه. ۱۲ چیمای شی رقم اللنگه آتش بود و د
بَلِه سر شی تاج های کلو؛ یگ نام دزو نوشه بود که هیچ کس
نموفامه بغیر از خود شی. ۱۳ او یگ چپن د جان خو دشت که
د خون غوطه شدد و نام ازو «کلام خدا» گفته موشد. ۱۴ لشکر
های آسمانی که د بَلِه آسپ های سفید سوار بود و کالاهای
كتان سفید و پاک د جان خو دشت، از پُشت ازو مورفت. ۱۵ از
دان ازو شمشیر تیز بُر موشه تا قد ازو میلت ها ره بِزننه. او قد
سوطه آینی د بَلِه ازوا حکمرانی مونه و چرخشت شراب غضب
خدای قادر مطلق ره قد پای خو لغه مونه. ۱۶ د چپن و ران
شی اینی نام نوشه يه: «شاه شاهان و رب الارباب.»

۱۷ اوخته دیدم که یگ ملایکه د آفتوا ایسته بود و د تمام
مرغکوی که د مینکل آسمو پر میزنه، د آواز بلند چیغ زده
گفت: “بیید، بَلِه مهمانی کله خدا جم شنید” ۱۸ تا گوشت
پادشايو، گوشت قومندانا، گوشت قدرتمندا، گوشت آسپ ها
و سوارای ازوا و گوشت پگ مردم ره بخورید، از آزاد و غلام

^{۱۹} بعد ازو دیدم که جانورِ وحشی و پادشايون زمی قد لشکر
های خو جم شد تا قد امزو آسپ-سوار و لشکر شی جنگ
^{۲۰} کنه. و جانورِ وحشی گرفتار شد و قد ازو قتی پیغمبر
دروغی که د حضور ازو معجزه ها نشو میداد، ام گرفتار شد.
پیغمبر دروغی د وسیله امزو معجزه ها کسای ره گمراه کدد
که نشانِ جانورِ وحشی ره د جسم خو قبول کدد و مجسمه ازو
ره پرستش موکد. اونا هر دوی شی زنده د دریاچه آتش که قد
^{۲۱} گوگرد سوخته ری بود، آندخته شد. باقی منده ازوا قد
شمშیری که از دانِ آسپ-سوار بُر موشد، کشته شد و تمام
مرغکو خود ره از گوشتِ ازوا سیر کد.

هزار سال

^{۲۰} بعد ازو یگ ملایکه ره دیدم که از آسمو تاه مییه و
کلی چاه بے آخر د پیش شی استه و یگ زنجیر کله د دست خو
دره. او امو آژدار یعنی امو مار قدیمی ره که ابلیس یا شیطو
استه، دستگیر کد و او ره بلده یگ هزار سال بندي کد. او

ره دَ چاهِ بے آخر پورته کد و درگه ره دُ روی شی بسته کده
مهر-و-لاک کد تا او دیگه نَنَنه مِلَّت ها ره گُمراه کُنه تا امو
یگ هزار سال د آخر بِرسه. بعد اُزو بَلِدِه يگ وختِ کم او باید
ایله شُنَه.

۱۴
اوخته تَخت ها ره دِیدُم و کسای که دَ بَلِه ازوا شِشتُد، دَزوا
اختیارِ قضاوت کدو دَدَه شُد. امچنان جان های کسای ره دِیدُم
که بخاطرِ شاهِدی عیسیٰ و بخاطرِ کلامِ خُدا سر شی بُریده
شُدد. اونا جانوَر وَحشی و یا مُجَسِّمه شی ره پَرَستِش نَکُدد و
نشانِ اُزو ره دَ پیشانه ها و یا دِستای خُو قبُول نَکُدد. اونا
دُوباره زِنده شُد و هزار سال قد مسیح حُکمرانی کد. ^{۱۵} لیکن
باقي مُرده ها تا آخرِ امزُو یگ هزار سال دُوباره زِنده نَشُد. ای
«دُوباره زِنده شُدونِ» اوَّل آسته. ^{۱۶} نیک بَخت و مُقدَّس آسته
کسی که د «دُوباره زِنده شُدونِ» اوَّل حِصّه دَره. مَرگِ دَوم دَ
بَلِه ازوا قُدرت نَدره، بَلکِه اونا از طرفِ خُدا و مسیح پیشوایبو
مُوشِه و هزار سال قد اُزو حُکمرانی مُونه.

محْكُوم شُدونِ شَيْطَو

۱۷ وختیکه امو هزار سال تکمیل شُد، شَيْطَو از بَندی گری خُو

آزاد مُوشه^۸ و بُرو مییه که مِلَّت ها ره دَ چار گوشه زمی، یعنی جوج و ماجوج ره گمراه کنه تا اونا ره بَلَدِه جنگ کدو جم کنه که تعداد ازوا رقمِ ریگ دریا الی کلو آسته.^۹ اونا دَ پراخی زمی دَ حرکت شُد و اُردوگاه مُقدَّسین و شارِ دوست-دشتنی ره محاصره کد، لیکن از آسمو آتش بارید و اونا ره قورت کد.^{۱۰} و ابلیس که اونا ره گمراه کدد، دَ دریاچه آتش و گوگرد آندخته شُد، دَ جایی که جانور وحشی و پیغمبر دروغی آندخته شُدد. اونا شاو و روز تا آبد عذاب مُوشه.

قضاياً مُرده ها

اوخته یگ تخت کله سفید و امو ره که دَ بَلَه شی شِشْتُد^{۱۱} دیدم. آسمو و زمی از حضور ازو دوتا کد و بَلَدِه ازوا هیچ جای پیدا نشد.^{۱۲} و مُرده ها ره ریزه و کله شی ره دیدم که دَ پیش تخت ایسته بود و کتابا واز شد. یگ کتاب دیگه ام واز شد که او کتاب حیات بود و مُرده ها دَ مُطابِق اعمال خو که دَ کتابا نوشته بود، قضاؤت شد.^{۱۳} و دریا مُرده های ره که دَ مَنِه شی بود پس دد؛ و مرگ و عالم مُرده ها ام مُرده های ره که دَ مَنِه ازوا بود پس دد و هر کس دَ مُطابِق اعمالی که انجام دده بود، قضاؤت شد.^{۱۴} بعد ازو مرگ و عالم مُرده ها دَ

دریاچه آتش آندخته شد. دریاچه آتش مرگ دوم استه.^{۱۵} و هر کسی که نام شی د کتاب حیات نوشته نشده بود، او د دریاچه آتش آندخته شد.

اورشلیم نو

۲۱ بعد ازویگ آسمون نو و یگ زمین نو دیدم، چون آسمون اول و زمین اول از بین رفت و دریا دیگه وجود نداشت. اوخته شار مقدس، یعنی اورشلیم نو ره دیدم که از طرف خدا از آسمو تاه میه، آماده شده رقم یگ بیری که بلده شوی خو جور شده.^۳ و یگ آواز بلند ره از تخت شنیدم که موگفت:

”اینه، جایگاه خدا د مینکل انسان ها استه“

و او قد ازوا بود-و-باش مونه.

أونا قَوْمٌ اُزُو مُوشَه

و خُدا خود شی قد ازوا مُوشَه

و خُدای ازوا مُوشَه.

^{۱۴} او هر آویده ره از چیمای ازوا پاک مُونه.

و مرگ دیگه نیسته

و ماتم و ناله و دَرد و جُود نمیدشته بشه،

چراکه چیزای اول از بین رفت.

^{۱۵} اوخته امُو که دَبِله تَخت شِشْتُد، گفت: "اینه، تمام چیزا ره از نَو جور مُونم." و بسم گفت: "نوشته کُو، چراکه امی توره ها قابِلِ اعتِماد و حقِیقت آسته." ^{۱۶} بسم دَز مه گفت: "تمکِیل شُد! ما «الف و يا» و «شروع و خَتم» آستُم. هر کسی که تُشننے يَه، ما از چشمِه آبِ حَیات مُفت-و-رایگان دَز شی میدیم.^{۱۷} و هر کسی که پیروز شنَه، وارِثِ پَگِ امزی چیزا مُوشَه و ما خُدای ازو مُوشِم و او فرزند مه. ^{۱۸} لیکن تَرسُوها، بے ایمانا، فاسِدا، آدم کُشا، زِناکارا، جادوگرا، بُت پَرستا و تمام دروغگویا، جای شی دَ دریاچه آسته که قد آتش و گوگرد سوخته رَیی يَه که مرگِ دوم آسته."

^{۱۹} بعد ازو یکی امزُو هفت ملایکه که هفت پیله پُر از بَلَای آخری داشت، آمده دَز مه گفت: "بیه که ما بیری ره دَز تُو

نِشُو بِدِيْمُ، خاتُونِ باره ره.^{۱۰} اوخته او مَرَه دَرَوْحَ دَيْگَ كوه
كَلَه و قِيل بُرد و شارِ مُقَدَّسِ اورُشَلِيم ره دَز مه نِشُو دَد كه از
آسمو از طرفِ خُدا تاه مِيمَد.^{۱۱} او شار پُر از جلالِ خُدا بُود و
روشنَى شى رقمِ سنگِ قِيمَتِي، يعني مِثْلِ يَشْم بُود و شَفَاف
مِثْلِ بِلَور.^{۱۲} او يَگ دِيَوالِ كَلَه و قِيل و دوازده درَگَه دَشت كه
دَدرَگَه هَاي شى دوازده ملايِكَه بُود و دَبَلَه درَگَه هَا نام هَاي
دوازده طَايِفَه بَنَى إِسْرَائِيل نقَش شُدد:^{۱۳} او سِه درَگَه سُون
شَرق دَشت، سِه درَگَه سُون شَمال، سِه درَگَه سُون جَنُوب و سِه
درَگَه سُون غَرب.^{۱۴} دِيَوالِ شار دوازده پَاي-سنگ دَشت كه دَ
بَلَه ازوا نام هَاي دوازده رَسُولِ باره نقَش شُدد.

امُو ملايِكَه که قد ازمه توره مُوكَفت، يَگ سِيخِ اندازه گِيرى
طِلَّابِي دَشت تا شار و درَگَه هَاي شى و دِيَوالِي شى ره اندازه
بِكِيره.^{۱۵} شار دَشكَلِ چاركُنجِي بُود و درازِي شى دَاندازه بَر
شى بُود. امُو ملايِكَه شار ره قد امزُو سِيخِ اندازه گِيرفت که
درازِي اُزو دوازده هزار تِير پورَتو بُود و درازِي و بَر و بِلندي
شى يَگ برابر بُود.^{۱۶} او دِيَوالِ شى ره ام اندازه گِيرفت که يَگ
صد و چِل و چار توغَى بُود، مُطابِقِ اندازه گِيرى إِنسان که
ملأيِكَه اُزو کار مِيگِيرفت.^{۱۷} دِيَوالِ شى از يَشْم جور شُدد و

خود شار از طِلّای خالص جور شُدد که رقم شیشه پاک بود.

^{۱۹} پای سنگ های دیوال شار قد هر رقم سنگ های قیمتی

مُزین شُدد: پای سنگ اول یشم بود، دومی یاقوت نیلی،

^{۲۰} سومی عقیق آوی، چارمی زمرد، پنجمی عقیق سُرخ،

ششمی عقیق چگری، هفتمی زَبَرَجَدِ زَرَد، هشتمی عقیق

آسمانی، نهمی یاقوت زَرَد، دهمی عقیق سَوْز، یازدهمی

فیروزه و دوازدهمی لعل کبود. ^{۲۱} امُو دوازده درگه، دوازده

مُرواری بود، هر درگه از یگ مُرواری جور شُدد. سرک کِله

شار از طِلّای خالص بود، پاک رقم شیشه.

^{۲۲} ما هیچ خانه خُدا دَ امزُو شار نَدِیدُم، چراکه خُداوند-خُدای

قادِر مُطلق و باره، عِبادتگاهِ اُزو آسته. ^{۲۳} و شار دَ آفتَو و

ماهتو ضرورت نَدره که دَ بِله شی روشنیی کُنه، چراکه جلالِ

^{۲۴} خُدا او ره روشو مُونه و باره چراغ اُزو آسته. مِلت ها دَ

روشنی اُزو راه موره و پادشايون زمی شان-و-شُوكت خُوره دَ

^{۲۵} مَنِه اُزو میره. درگه های شی دَ غَیتِ روز بسته نَمُوشَه،

چراکه شاو دَ اونجی وجود نَمِیدَشته بَشه. ^{۲۶} مردم شان-و-

^{۲۷} شُوكت و ثُرَوتِ مِلت ها ره دَ مَنِه اُزو میره. و هیچ چیزِ

ناپاک دَ مَنِه اُزو داخل نَمُوشَه و نَه ام کسی که کارای زِشت ره

انجام بِدیه یا فریبکاری کُنه، بَلکِه تنها کسای که نام های ازوا دَ کِتابِ حَیاتِ باره نوِشته شده، داخل مُوشہ.

دریای آبِ حَیات

۲۲ اوخته امُو ملایکه دریای آبِ حَیات ره دَز مه نشو دَد که رقمِ بِلور الَّی شَفاف بُود و از تَحْتِ خُدا و باره جاری مُوشد و از مینکلِ سَرَکِ کِتَه شار تیر مُوشد. دَه رُو بَغْلِ دریا درختِ حَیات بُود که دوازده دفعه میوه مِیگِرفت یعنی دَه ماه میوه خُو ره مِیدَد و بَلگَای امزُو درخت بَلده شفای مَلَت ها بُود. ^۳ دَ أونجی دِیگه هیچ لعنت وجود نَمِیدَشته بشه. تَحْتِ خُدا و باره دَ مَنِه شار مُوبَشَه و خِدمتگارای خُدا او ره عِبادت مُونه. ^۴ اونا چهِره اُزو ره مِینگَرَه و نام شی دَ پیشانِه ازوا مُوبَشَه. ^۵ دَ أونجی دِیگه شاو نَمُوشَه و اونا دَ روشنیَّی چراغ و روشنیَّی آفتَو ضرُورَت نَمِیدَشته بشه، چون خُداوند-خُدا بَلده ازوا روشنیَّی مِیدَدَه و اونا تا اَبَدِ الْأَبَاد حُكمرانی مُونه.

۶ و ملایکه دَز مه گفت: "امی توره ها قابلِ اعتماد و حقِیقت استه. خُداوند-خُدای اَرواح پیغمبرَا، ملایکه خُو ره رَبی کده تا

چیزای ره که دَزُودی باید واقع شُنَه دَخِدمتگارای خُو نشو
بِدیهه. ”

عیسیٰ مُوگیه: ”اینه، ما دَزُودی مییم! نیک دَبَختِ کسی
که توره های پیشگویی امزی کتاب ره دَل خُونگاه کُنه.“

ما یوحنًا کسی آستُم که امی چیزا ره شِنیدم و دیدم. و
غیتیکه شِنیدم و دیدم، دَپایای امزُو ملایکه که امی چیزا ره
دَز مه نِشو دَد، افتَدُم تا او ره سَجده کُنم.^۹ لیکِن او دَز مه
گفت: ”ای کار ره نَکُو. ما قد ازْتُو و قد بِرaron تُو پیغمبرَا و
قد کسای که توره های امزی کتاب ره نِگاه مُونه، هم خدمت
آستُم. تنها خُدا ره سَجده کُو!“ ^{۱۰} بعد ازْو دَز مه گفت: ”توره
های پیشگویی امزی کتاب ره مُهر-و-لاک نَکُو، چراکه وخت
نِزدیک آسته.^{۱۱} کسی که بَدکار آسته، بیل که دَبَدکاری خُو
إدامه بِدیه و کسی که فاسِد آسته، بیل که دَفِساد خُو إدامه
بِدیه و کسی که عادِل آسته، بیل که دَعدالت خُو إدامه بِدیه و
کسی که مُقَدَّس آسته، بیل که خود ره مُقَدَّس نِگاه کُنه.“

عیسیٰ مُوگیه: ”اینه، ما دَزُودی مییم! آجر مه قد ازمه
قتی آسته تا دَه رس مُطابِق اعمال شی بِدیم.^{۱۲} ما «آلف و

يا» آستم، «اول و آخر» و «شروع و ختم». ^{١٤} نیک د بخت

کسای که چپنای خو ره مُوشویه تا د درختِ حیات حق دشته
بشه و پنه از درگه د شار داخل شنه. ^{١٥} د بُرون شار سگا،
جادوگرا، زناکارا، آدمکشا، بُت پرستا و تمام کسای آسته که
دروغ ره خوش دره و دروغ مُوگیه. ^{١٦} ما عیسى، ملایکه خو
ره ریی کدم تا دز شمو د باره امزی چیزا د جماعت های
ایماندارا شاهدی بدیه. ما ریشه و نسل داؤود و سیارة روشنون
صبح آستم. ”

^{١٧} روح و بیری مُوگیه: ”بیه.“

و هر کسی که میشنوه، بُگیه: ”بیه.“

و هر کسی که تُشنه یه، بیه

و هر کسی که دل شی آسته، از آبِ حیات مُفت-و-رايگان
پگيره.

^{١٨} ما يوحنا تمام کسای ره که توره های پیشگویی امزی کتاب
ره میشنوه خبردار مُونم: اگه کدم کس د امزیا کدم چیز اضافه
کنه، خدا بله های ره که د امزی کتاب نوشته شده، د بله ازو

إضافه مُونه.^{١٩} و اگه کُدم کس از توره های پیشگویی امزی کِتاب کُدم چِيز کم کُنه، خُدا او ره از درختِ حَيَات و از شارِ مُقدَّس که دَ امزی کِتاب ذِكر شُده، بے نصِيب مُونه.

امُو که شاهِد امزی چِيزاً أَسْتَه، مُوكِيَه: "أَرَى، مَا دَرْزُودِي مَيْمُون." آمين! بِيه آي مَولا عَيْسَى.^{٢٠}

فَيَضِّلُّ مَولا عَيْسَى نصِيبِ پَغِ [مُقدَّسِين] شُنَه. آمين.^{٢١}